

列

朝

詩

集

列朝詩集 丁集第八

陸少卿師道 一十一首

彭布衣年 二十五首

岳山人岱 四十一首
覽今由瑞華一十二

雨舟王濟 一首

桃溪陸係 六首

大石山人顧元慶 二首

嵩山徐伯虬 二首

顧孟林 二首

清門山人沈仕 三首

覽陸承憲 三首

居布衣節 六十七首

劉僉事鳳 五首

章副使美中 三首

白陽山人陳淳 六首

陸教諭之裘 一十八首

慈泉山人袁昭陽 三首

時川姜龍 二首

陽山湯儒 一首

謝湖袁駿 一首

九峻顧開 一十首

少溪王延陵 四首

王較書擢登 二百三首

曹山人子念 五首

張舉人鳳翼 四首

魏同知學禮 五首

工部士雅 八首

顧副使大典八首

周秀才天球六首

錢處士穀一首

陸布衣治四首

張布衣本二首

顧隱士祖辰九首

梁太學辰魚五首

陸文組二首

朱太學承爵二首

陳山人鳳四首

趙秀才綱二首

徐定夫一首

危言五首

徐後一首

吳舉人世忠五首

唐汝龍二首

孫良器二首

范如珪一首

吳錦一首

鄭玄撫一首

汪日夢二首

詹斗文二首

邵山人正巳二首

李山人敏三首

陳山人有守三首

汪太學淮四首

陸少卿師道

師道字子傳長洲人嘉靖戊戌進士授工部主事改禮部儀制以母病告

歸侍春年尚未三十也杜門却掃二十五年嘉靖末用薦起南祠部遷膳部郎改尚寶司少卿穆廟初病不任拜起予告歸貧並甚至鬻衣以給饘粥又六年而卒子傳自儀部歸已負重名文待詔方里居北面稱弟子手抄典籍積數千卷丹鉛儼然善詩工小楷古隸傍曉繪事入謂待詔四絕不減趙吳興子傳約略似待詔而風尚標置亦相亞云吳門前輩自子傳道復以迄於王伯穀居士貞之流皆及文待詔之門上下其論議師承其風範風流儒雅彬彬可觀造風餘緒至今猶在人間未可謂五世而斬也何元朗云衡山先生在翰林大爲姚明山楊方城所窘時昌言于衆曰我衙門不是兩院乃容画匠處此惟黃泰泉馬西玄陳石亭與相得酬唱甚歡二人只會中狀元更無餘物衡山數公長在天地間今世豈更有道着姚涿楊維聰者耶快哉斯言百歲而後猶可以興起也

鴛鴦曲

雙鴛並雙翼雙宿復雙飛清波動雙浴明月照雙歸雙浦沈雙影雙花拂雙頸眠沙雙夢同渡渚雙心警雙去雙來處雙游雙戲時雙起隨雙鷺雙立視雙魚雙舟舉雙槳雙蓮礙雙榜應有無雙人願逐雙鴛往

張烈婦

嘉定張烈婦嫁汪生之子汪之母與群惡少亂烈婦恥之姑怒謀令一人
強亂烈婦烈婦不從殺之余友婦熙甫高其節行紀其事請余作詩
抱壁置泥塗皎然質不泯葛蒲九節花雖死常流芬十三學裁衣十六誦
詩書十七婦道成十八爲君妻君家本富貴家累千金資大編建高檣商
販名四馳高門安亭里公姥相共居升堂見公姥稱婦好容儀置酒大設
樂四座爭喧喧黃衫少年子綠幘侯家奴謔浪間調笑踞坐氣何麤阿姑
召新詩出見勿遲遲耳箸瑟瑟鑲頭簪辟寒犀步搖九威鳳跳脫兩文螭
灑糝勿艸艸傅粉更施朱貴客握瓊玖待汝繫羅襦新婦口不言中心自
思惟少長父母側不令見男兒今在舅姑傍內外豈有殊趕趕諸少年何
用見妾爲耕成更却坐抑首故徘徊諸客不自得恨恨各自歸入門不數
月數數見所私人語何嘈嘈朋至何施施出入閨闈間戚施與蓬蔭自成
更耳語無復避尊卑新婦心內傷掩而淚雙垂往昔辭家日母命一從姑
姑今既若此稟命將何如入室問客子彼人知阿誰何大無禮節來共阿
姑嬉客子答新婦通家卿勿疑出入有何嫌卿勿煩言詞中昔不可道雄

狐來綏綏阿姑昨入浴邀客解裙裾提湯見竝裸新婦大驚啼徒跣走歸
家見母一何悲父母擇婚時胡不惜門相奔奔鴉有偶臙羶鷓有妃開關
睚翼竝翩翩毚羽齊豈無清白門棄之道路隅少小聽姆訓貞節自操持
十三學裁衣十六誦詩書十七婦道成十八爲人妻舉動循禮法許身秦
羅敷阿姑旣失行賤妾蒙其汚願歸供養母苦辛長不辭勿令蕭艾叢一
變蘭與芝勿令瓦礫場得混瑾與瑜阿母見女言搥胸大悲摧嫁女爲永
畢不意有崎嶇且住勿遽去姑應有改圖阿姑見婦去舍怒來致詞待汝
意不薄早歸勿趁起一聽汝言語謝客掩重關勿使他人言婦姑有參差
阿女白阿母我姑意已回子婦無令人阿姑誠善慈穿我嫁時服乘我去
時車入門謝阿姑數月太區區願姑永謝客恩義兩不虧低頭語客子君
常謙內治閉門畜獐犬慎勿納狂徒告翁少飲酒飲酒恐非宜阿翁聞婦
言沈醉口鳴嗚客子聞婦言對母言嘔嘔阿姑聞婦言懊惱與榜笞狂子
聞婦言咄咄怒且咄吾豈爲姬少吾豈爲媼姝枯楊反生華艾假定婁豬
所爲酒食謀金珠資贈遺彼雄旣昏昏彼雛亦茁茁婦也獨不願爪爪生
怨容况婦誠大佳玉雪爲肌膚修眉淡楊柳纖手瑩柔荑皓齒瓠犀粲笑

臉芙蓉披頭上玉燕釵倭髻綰青絲腰間金鳳裙雲霞生履綦誠復與之
仰豈不少且姝濁水一同流姑婦兩不訾金多得好婦此生足歡娛彼自
謂獨清何不汨以泥彼自謂獨醒何不醜以醜作計告阿姑爾婦太癡愚
須令入我計庶不爾瑕疵阿姑卽聽許卿其善爲謨謂婦速織帨吾將遣
可兒新婦白阿姑可兒寔人奴妾豈爲奴織慎勿相輕詒阿姑慚且怒誓
言同其汙令子遠書獄留婦守空帷登樓飲狂子接坐共歌呼酒酣錯履
罵命婦前捧卮婦怒不肯應從步去不回佻達定相侮起攬頭上梳新婦
泣且誓還之意脂韋梳旣汙奴手豈復可親膚寸折擲之地不復顧踟躕
狂子頗自失阿姑心無涯召客與共浴縱容入中閨羅帷忽自開直犯千
金軀新婦呼且罵抗拒力不遺舉杵奮擊撞脫走去莫追自傷潔白身忍
使行露濡十三學裁衣十六誦詩書十七婦道成十八爲人妻舉盃循禮
法許身秦羅敷阿姑竟相負豈復用生爲早得歸黃泉我身幸無虧慟哭
自投地力竭四體墮綿綿氣欲絕冥冥神已離阿姑因作念此可使人知
不如滅其口快意勝決疽爲食召諸少繫縛加羈縻前行操雙斧後行袖
金推翁霍斧爰下縱擊推竝揮婦痛願卽死不願更須臾奴何不刺死使

我頸不殊可憐金石貞竟死椎斧餘飄風東南來縱火將焚屍皇天爲反
風屍重不可移鄰里覺相報官府爲窮治阿姑始自悔回罵諸塔沾我家
何負若陷我於罪羅相攜入圜圍不得辭刑誅縣門大道邊赫赫烈婦祠
先事三日前祠中出靈威鼓聲夜闌闌烈火炎炎飛婦死三日後彷彿廟
中趨高行令祀典有司表門閭俎豆禮常嚴青史名不渝垂誠後世人完
名當若茲

玉女潭題贈史吏部恭甫

玉陽古洞天名是神僊宅因君地始顯令人思俱逸玉岡遠鸞謁雲莊甄
芝木修廊俯大觀列卦開玄室虹橋迴隔几著臺靜研易生明抱弦月澄
觀披雲物玉虛奠其中別館竦而翼門前萬梅竹慈禱麗綿密琅玕群玉
山環珮毓姑射想當經始時頗極位置力揆妙游邃初選勝窈窕剔爰建
玉清祠實表上真蹟禪棲儼大士仙寓藹羽客岩巖玄真閣杳眇古佛窟
招邀縉素流迴移造化德疏幽美石露翦莽珍木出導澗龍馬呈芟林鳳
麟集青驪張果繫白鞵初平叱蹠獅與馴象殊狀各異質魏碑訝天成承
雷雨欲滴盤玉擁琳琅期仙望裾舄宴處超然宇徙倚瑤臺側坐對芙蓉

城一一青可摘杯浮縹緲峰太湖翠如拭琪樹挺瓊枝獨木藥維十幽洞
俯靈木三株原自一飛雲被綺郁采藥路詰屈豈無斲苓者欲往迷所適
巒嶂妙連絡艸樹相蔚鬱回巖上盤互側錦厓四塞中爲玉女澗靈源澄
水碧陰壑天倒開蒼蒼疑正色月魄墮淡谷寶氣浮瑟瑟石梁亘清漢龍
鼻吸金液伏流轉地中萬壑爭灌射翠微玉一泓淵凝瑩沈寂稍下瀉爲
湍瓊樹上蒙羃輪囷壽千載扶踈影百尺曲磻可浮觴廣蔭不見日興遠
始透迤峽束遽奔突虬鬣奮相角羸羸怒方勃盤渦車輪轉湖泝雷霆擊
飛橋沸萬玉砥柱中流屹西行得龍湫崩厓雷斧劈淙淙湛碧琳峭壁漱
金骨娟娟淨如染杳杳深莫測懸舟浮空明俯首度偈公中虛別有天外
視似無滅非氣上通餘陽光下容隙嘗觀蝦蟇游知有鬣羊螿厓顛虛窅
存猶蛻蛻跡靈響矯玉柱瑩帶流滌白其旁洞豁衍三折互斷辭恍游
君山陽由唐履其闕牖通水犀靈屋傾龍藏闔天碑轟呼際淨繫舒的鱗
穿石倚撐拄飛瀾迴蕩激散空垂地肺溢汎交泉脉右盤青牛峽紫氣紛
可挹朝日照金晶巖下光奕奕仰捫瓊寶羅奇怪不可識方坻環玉流圓
折數珠璣赴壑急於奔緣厓亂如織鐘寶聲始洪皇皇音孔翁回陽勢忽

旋怒湧歸潮入安行孰爲達逆捲竟誰扼磯頭止青鳥如欲對以臆玄津
示吐咽一氣妙呼吸吾因灌輸理悟彼蒼生術騰炫靈異境信與塵凡隔
歷世閱勝絕一發道古昔蓬萊豈在遠桃源邇可卽我來竭幽興游覽盡
微蹟森奇目屢奪恂况神如失初來卽忘歸欲去更遐歷君本謫仙人名
猶在綠簪帝命主茲山功成有申錫吾聞白玉京官府足衆職不如且住
世逍遙領泉石願攜金光草長共爾游息

昌公房看牡丹歌

嘗聞樂府牡丹芳春來一城人若狂我今日日被花惱毋乃花淫如洛陽
吳中三月花如綺百品千名闢奇靡名園往往平泉庄禪宮處處西明寺
我今瘦杖登武丘昌公精舍花枝柔動如迎笑靜若醉頰白腮紅名玉樓
此花初移得春淺六寸圓開天女面對花一飲三百杯醉裏題詩寫花片
沈家白花濕不緇三花相亞玉交枝何郎膩粉拭香汗龍國新教淡掃眉
主人開筵浮太白爲花傳神贈賓客輕綉納颯欲飄香琪樹盈盈轉生色
酣酒爲言興未已邀看石佛千頭紫衣色相鮮繡佛前天芬似入祇林裏
初來一朵如傾盃坐久數花相次開花神好客向客笑不用臨風羯鼓催

三
日看花花轉靚未似潘園稱最盛中庭一樹丈五高碧瓦雕簷錦叢映
西齋亦是玉樓春數之二百花色勻壽安紅與細葉紫更有異種誇東鄰
越羅蜀錦看不足豔製明妝貯金屋身如遊蜂逐花戲月明遂向花房宿
也知天意自憐人但令到處花枝新况逢晴景與佳侶狂吟爛醉今經旬
人生歡樂能幾許百病千愁更風雨安得年年似此游作歌且紀千花譜

張公洞

女媧補天餘礮壘積之厚地藏精靈五色久閱真宰怒地莫設愛開靈
光通覆盂徹深杳竇啟寶櫃窺晶熒入門下視氣莫測但見島嶼浮滄溟
既登香臺景始合恍若象緯羅天庭仰看懸乳詭萬狀金膏水碧琅玕青
雲垂霞起各堆瓊珊瑚玉樹何亭亭四垂峭壁下空洞曲房便室盤瓊瑤
中間萬石儼離立高下向背殊其形有如靈山散花會五百大衆來傳經
又如天吳鬪海若四目九首紛猱螭巉峨上轟湧寶刹迤靡旁轉衍連屏
巍冠正弁侍天闕芙蓉菡萏排寒汀遠看紺綠似塗聖細視刻鏤疑模型
固應造化幻狡獪自是元氣初泓渟更開石牀在深黑仙田丹竈居沈冥
乃知仙客鍊五石故遣神功開六丁采時靈液尚流地至今餘乳能延齡

褰衣卽欲進危磴弱足猶阻探幽窟劃然長嘯且歸去他年來州新宮銘

善權洞

善卷讓位尋丹丘逍遙居此巖之幽玉山寶房開瓊甍茅茨土塔寧足留
重巖磅礴啟三洞下爲邃室高爲樓樓疑蜃氣化成闕丹青絳綠虹霓浮
室是白龍潛作藏含精祗寶多琳鏤中隆旁殺若覆鬲氣蒸乳滴同懸旒
瑤釘壁拱互照映交相複壁相連句樓中百獸恣騰擲怒視渴虎凌飛蚪
亭亭玉柱貫掌軸狂怪未散掣其鉤鹽堆磊磊米崇稟仙田作敵誰所覆
室墜丸石墜且墜下受玉液流金溝飛流噴薄走戶下笙鏞聞作交鳴球
絳爲片翠深莫渡龍宅南隩司陳收搜珍挾寶橫充溢飯餽全甚誠堪羞
此公騎龍果安在我欲御風從之游靈仙洞府足長往下視濁世真蜉蝣

洞山用張之象韻

洞山虛中高揭唇白石齒齒排爲齧引吸波浪氣吐吞張吻露蹠何鱗皴
我疑巨鰲踞而蹲唯物未合口流津人言中穹如甕益我畏其舌不可捫
盤舟強與闖其門但見玉液滴靈根進穿石骨窺澗淪更訝鯨首承崑崙
柱支軸貫維厚坤仰看宇覆爛若銀卿雲一色紋魚鱗引手歷歷捫星辰

俯扣洞房深九闔中有神物雲書屯欲往探之路苦湮川祇山鬼司其關
何年有路通人神往與一醉桃花春

石城曲題采蓮圖

秦淮水綠芙蓉明玄武湖邊烟艇橫香風翠袖暮雲亂落日新妝紅浪盤
城隅濠曲歌聲起却寄愁心棹謳裏恨不相攜桃葉渡心知同在長干住
須史花冥鳳凰臺帝闕回看錦作堆明月各隨珠珮去白鷗獨送綠舟回
蓮浦紅衣秋露濕桂林金粟秋風急相逢江上采蓮人回橈猶向花間立
帝京曾憶看花行画裏今瞻雲錦城十年漁舸滄州臥羞對紅蓼白髮生
八月十六日同文太史諸公登郊臺觴治平寺竹下待月行春橋

夜泛胥門作

闔閭城西佳山水况復秋清風日美百斛游船穩於屋錦帆瑞席空明裏
黃山西轉古橫塘五陽雲深盤上方飛橋連跨石湖口螭影相銜明鏡旁
夕陽把酒郊臺上峰色湖光迴相向表裏河山憶伯圖逶迤巒嶺開行障
白雲裊裊紫薇村湖光蕩薄入瑤樽夕霏掩隱梵王閣松逕行穿山寺門
山僧不歸鐘磬隔柳竹虛堂翠光射踈影低揺醺醖寒玉人笑倚琅玕碧

可憐落日情依依空林栖鳥催人歸
蘭舟不解惜清夜坐待圓景升宵暉
胡牀醉刷金鬢背徙倚憑欄酒頻
酌薄雲灑氣互吐吞坐看東天尚
蒙昧須臾光射靈虛宮玉盤飛出
滄海東金波奕奕掣千電彩雲皎
皎騰雙虹時時清漢微氣度隱隱
冰輪馳溝霧掩抑徘徊未全露漸
取清光照歸路画鷁翩翩凌廣
寒俯看碧浪躍銀九百花洲邊花
色畫花中樓閣明朱欄此時柝行
何足敷歌聲遺雲酒如雨庾公長
嘯興不淺阮籍沈酣狂欲舞莫愁
露濕紫絳裘月光常隨青翰舟君
不見胥門扶目郊臺圮何不清宵
秉燭游

晚過冶平

修竹藏精舍香林遶化城
窗中九峰秀門外五湖平
綠樹涼雲合丹楓夕照明
祇緣山太靜易得感秋聲

秋夜獨坐

寂寂復寥寥寒燈掛環堵
犬吠何處村蟲喧今夜雨

白陽山人陳淳

淳字道復後以字行字復父吳人父以可世家郡之姚湖富而有文與文

徵仲交道復少師徵仲天才秀發善畫師米南宮叔明子久尤好寫生一
花半葉淡墨紛斜非画工可及也詩取適意不求工其集出俗子搜訪凡
猥不足觀仲子祐飲酒縱誕有竹林之習画亦放浪不俗

東園四首

嘉靖非真夏秋作

懶拙無能事獨憐柳自存竹扉低近水花徑曲通園老婢強供爨愚兒且
應門古今多爾爾何處向人言

舉世爭趨進誰能事息機窮衣猶不悟老去漸知非骨肉貧招并交游懶
致稀衰年須却步自識此心微

運命生多蹇羸窮老自勝行藏如逐客况味一枯僧久病醫難治長貧益
亦憎旁人訝長嘯錯比是孫登

獨酌林臯下厭厭不計籌似能添野興還可慰羈愁月色十分好虫聲一
片秋壁閒何物在寒氣隱吳鉤

開島

重重烟樹鎖招

提野客來尋路不迷纔過板橋塵土隔落花無數曷爭啼

游越

吳淞江上放船

彭布衣年

時秋色撩人不自知行到萬松山下坐湖聲先在隔林西

年字孔嘉長洲

人長身玉立少磊落嗜讀書書法宗顏歐其名亞于文待

詔家徒壁立所

交多賢豪長者不肯一言于乞人有所餽雖升斗粟非文

字交峻辭若浼

卒以貧死有隆池山樵集

偃路披林入星

橋接漢通蒲萄新綠漲蹄螻欲飛虹海鶴鳴花外山鷄舞

鏡中清商移小

部明月幾回同

飛檻凌丹嶠瑯

軒俯碧漪晴峰浮倒影烟柳漾輕絲翡翠低還掠鴛鴦住

不疑接離何必

整綸釣許相隨

始覺花源近還

經藥晚深石牀留醒酒玉洞待鳴琴複徑迷難出穿雲不

易尋祇應餘凍

雪六月日陰森

峰色含青黛池

光疊翠紋浴沂修故事被袂枉賢群紫暖魚吹雪香飄蝶

墜雲石欄春晝

永碧灼午風薰

晚過橫塘

輕棹乘朝霽飛樓渡石梁山容明畫天影靜滄浪燕拂柳絲弱鶯啼花
氣香春光正韶麗況復古橫塘

大石

陽山青不斷陰壑路疑窮鰲凌松杪驂駢歷柱叢隔雲分野綠穿月逗
中空勝絕流孤賞疎鐘殷梵宮

祠部五臺陸公請告歸省却寄

欲事空王賦遂初道心如水淨涵虛歸航更挾浮杯侶輕橐惟裝譯貝書
帶月攜琴投野寺乘風看竹訪幽居秋蔬春茗俱談笑謝客高情白社餘

叔平山房

一曲谿山似剡川天開幽境與樓禪堤分柳浪烟中遠峰疊芙蓉水上妍
不斷香風吹寶殿有時花雨墜珠筵還憐假榻清秋夜數盞漁燈廢客眠
次韻魯望于公瑕宅觀舞有贈

晚風吹拂暑烟收曲宴重開醉客留竹外雲來疑昨夢花前月出浣新愁
驚鴻妙舞情偏逸雛鳳嬌歌韻轉悠綺席瑤屏圍疊嶂恍然身在閨風樓

庚戌秋書事八首

江南飄落雁初還
塞北霜飛久折綿
政甲旌旗臨細柳
早聞烽火達甘泉
關門自失姑庸險
斧鉞宜專制閫權
于石當年曾破虜
只今敵業許誰先
六營防秋車騎多
總戎游擊性來過
銷兵未報屯田策
獻捷虛傳太凱歌
幕下太官供玉饌
邊頭羸卒抱霜戈
遼軍豈異田橫士
好問投醪事若何
百萬通番國計存
勤王兵甲急宜屯
廟堂每忍安邊略
胡虜方嚙入哀魂
白艸自肥南牧馬
黃河不斷北來猿
鸞欲射旄頭落
雀食猶慚遠帝關
月滿胡天殺氣凝
建牙吹角漢家營
五陵霜露松楸近
千里風塵帶塞驚
累日未傳青海箭
何人爲掃黑山兵
朱門金穴笙歌沸
野哭那聞動地聲
閑廬徒焚廿四坊
錦雲花隊向來亡
澠涇未見收天馬
朔易無聞貢白狼
此日朝廷思李牧
他時文簿抑陳湯
運籌急爲據長策
鞭撻還須遠漢軍
內苑期僊拱穆清
上玄齋祭福群生
貂蟬夕拜趨三殿
貔虎晨嚴衛九城
泥水却思安石在
涇陽遙望子儀行
折衝尊祖真能事
夙夜諸公格理明
漢皇神武卽周宣
百伐長驅瀚海殘
信有嫫媿辭甲第
不妨通利築星壇
翰臺詔下蒼生慰
馬邑誅先白骨寒
千載中興元不異
佇看丕烈獨橫桓
楚客傷秋意未闌
白雲黃菊晚相看
江湖自足蛟龍臥
梁稻方謀燕雀安

北望星辰愁倚劍南來消息愧投竿
濁醪漫向船頭醉追逐輕颺下碧瀾

題衡會別頭小楷書秋聲賦

碧梧庭院露華清一葉翻階鶴夢驚
綠髮方曉玉堂客蠅頭燈下寫秋聲

鮑情爲靈墟二首

桃花寶扇擁檀郎翡翠輕裾熨麝香
爲怕羊車穿市窄青驄自控紫游韉

十三曾議寶珠名幾度春風醉舞塵
昨日副貽長樂觀文園偷訪愛珠人

庭前香檝花口遇雨口占二首

林徑無人盡日閑幽禽時弄語閑閑
胡牀坐對斜陽影詠得愈覺吹頰

兩壓喬柯覆短檝綠陰深處枕書眠
繁花十日風吹散猶有殘英壓綺鮮

上元病居篠川存山玉田寶山攜酒妓過訪

銀瓶綠酒挂香車遙過城東宋玉家
一笑相歡不辭醉爲憐明月在梅花

對月寄靈梁

天街霜月夜迢迢淮浦金波蕩
回橋才子行吟青玉案仙人吹和紫瑤簫

雨後

洞底泉聲谷口聞望中峰色香
誰分欲暮雨後金芝艸更踏前峰半濕雲

陸敘論之表

之表字孫太倉人參政容之孫評事伸之子胚胎前光少負才藻有志
經世不欲以書生自命嘗稱張子厚以書謁范希文袞結客取洮西大同
之變著論噫柄國者以爲按手可定頗爲里中兒所嗤弗恤也王元美明
詩評序云余稍長從學官習章句有陸秀才之表能詩高自許可鄉先生
自勉功而下弗論也卽席染翰輒數番多麗外不純又聞吳下彭年秀才
名彭故文氏家言也之表有詩曰南門仲子集好爲散詞有云本是箇英
雄漢差排做窮秀才其感繫託寄如此

賊平

波浪兼天寇盜窮將軍乘勝秦膚功三年戎馬閱河月不及狼山一夜風

書事三首

齊魯縱橫豺虎群天王親拜大將軍牙旂直捲狼山雪金印還瞻鳳閣雲
嚴寒朔漠艸爭凋萬乘遙臨水雪消天馬追風齊八駿彤弓弦月落雙鵞
樓船載日下江南吹鳳鳴鼉御酒酣吳花十月迎黃幄隋柳千秋映錦颿

辛巳志喜二首

金符宵捧肅公卿玉輦晨移望帝京花逐御旛連漢苑雲隨仙仗自襄城
天顏正位河山重宮肯收簾日月明一統共瞻新政美四垂從此罷塵驚
龍飛虎變仰光輝九御親承制作垂祀輅旂明崇廟典經筵燭晃肅朝儀
長春寶樹千花獻太液祥雲五色移環海車書皇帝有安州不製大風詞

黃雀兒

黃雀兒無食我穀家中有益縣裏有斛黃雀兒爾胡不仁朝食我穀暮食
我穀東家無網羅西舍無黏竿南村無弓前北隣無彈丸家人爲汝辛苦
不得閒黃雀兒莫欺人城中小兒利汝肥捕汝日暮嚮市門黃雀兒莫飽
食飽食身漸肥東飛化爲蛤

春日有懷

二月凭高思渺茫吳門樹轉綠波長青簾画舫移春色重閣飛樓動日光
鴻雁去邊秦苑字梅花落處漢官妝鄉闕苦憶他鄉客况爾他鄉憶故鄉

白茅夫

海風飄乾雪揚民何役白茅塘荷鍾別爺娘喚婦與阿郎我行爾莫憂官
府須有錢與糧出門行雲中手足發欲紅塘上千夫長日夜催作工不畏

見司空但畏見郎中郎中不愛錢小杖大杖愁殺儂人回寄聲語我妻莫
使爺娘知官府自有糧我腹常忍饑妻聞大哥去寄聲語我夫西家無閒
丁顧人東鑿河日費五十錢淚下機頭梭少壯有餘力莫怨開河役若使
吳田肥何妨一人瘠請看西方征戍兒天寒月黑胡風吹

贈梁五兄

太常画品稱絕俗海外皆傳夏公竹房樵有女十五人蘭佩雲鬟總如玉
夫人賢德婦中英伯夏乃是夫人生尚寶當年閱諸女獨指伯夏勞經營
公爲元娥擇佳壻盧氏一男才夔異便卜良期使委禽弱冠盧卿果登第
拜官刑部臨斬人斷元號躍趨其身大驚構疾棄結髮始信袁公相入神
紅顏寡婦悲秋早苦積空閨葉堪掃綠窗自泣啼烏夕青鏡那窺舞鸞曉
嫁時生女在盧門贅得梁賢生外孫才高卻遭世俗忌移家避謗東西奔
湖山舍館從人假賣藥談詩無識者舊友空存顧相公新親豈盡王司馬
吾母之母吳公妻伯娥異母還同孺若從夏氏論親戚我與梁兄何所殊
卽今暫寄胥門屋西山日映橫塘綠名園主人予婦翁停棹月下來三宿
梁兄牀頭無一錢呼兒具食雲松邊明燈滑几寫香茗長文短賦陳佳篇

嗟哉丈夫胡太息古來屈事誰能直眼前將相幾興衰風塵莫問樊侯憶
陸義姑姊歌

陸義姑姊女中不可無少年嫁爲蔣氏婦夫亡抱子夜泣衡門烏有弟天
下選給事留上都抗章斥宰相叩頭伏闕當天衢龍幃覽書宰相罷給事
亦謫蠻滇隅弟妻忽云沒弟在萬里途中何所有男女遺兩孤高堂胡
夫人眸昏但悲呼義君聞之語其子今日之責非我其誰乎汝謹守爾室
我往撫二雛誰謂寡姑老存亡甘與俱日提歲鞠勝已子姪亦相親忘母
徂弟遷縣令歸繼總義君保弟宜疾驅家有而姊在行行慎無虞弟無內
顧憂遂作兼程趨三年上書賜完璧二雛壯長明雙珠衣奩盡出義君手
日日縫紉到西甬一朝婚嫁畢復歸蔣氏從兒居弟率男若女長跪親捧
壺瀝我姑姊百千壽花前看舞紅擢瑜卓哉陸家好兄弟交游冠佩多名
儒共聞義君賢入門皆歎吁吁嗟乎弟有義姊姪有義姑嘉名籍流東吳
魯婦人李文姬叙布中真丈夫陸義君斯人徒金閨太史儘見采知予義
姑姊歌良不誣

兩齋名園春事芳闌臺小集暮行觴愆期肯使花神笑縱飲誰喚艸聖狂
入坐微風含楚佩照人明月墮胡牀行歌亦有穿雲調隔水遙傳陌上桑

庚子紀事

南沙頑夫不滿千恃險攫貨爭魚鹽摧牛殺狗亦耕種黃蘆白葦波連天
海濱者豪利兼取逞技獻謀官府前喜功憂變守臣職撫召不聽心煩煎
兵舟閱送文武吏炎秋直薄南沙邊諸軍相猜不相協遇賊出鬪戈矛捐
披颯擊鼓各歸縣騰謁道路謹相傳誰爲廣書揚都市臺司受誣盜亦冤
南畿咫尺路非遙惜無一人能照姦稱王命將河等語鳳樓疏入驚雲旃
重華震怒遣使者械繫失事諸官員紅顏白髮哭相送秋風淚滋西郭阡
夏曹薦出總兵者幕府卿分邊將權擁來邛兒半降盜提兵過市同饑
羣愚心知罪難免始從華屋搜金錢璜溼市上換殘衲吳淞江頭焚戍船
阻攔朝防豨虎出吹擊夜惱蛟龍眠我師揚舲復停泊欲出不出期頗愆
太倉孤城上官滿騎兵劍容相喧闐家家月黑宵鳴柝巷巷風寒朝執鞭
霜臺按節問武帥今日舉事何由遭群盜廿舟無帶甲官軍百艘多控弦
江郊犒師萬石餽州門賞士千金縣戎衣戰器等山積嗟爾虎牙胡敢然

夜分糜食曉出海賦舟一字遮津連將軍拜呼駕五漿頓夫感激爭相先
人生自古有天幸巨海浪靜如平川龍鬚火鎗雜羽箭騰烟迷目衣背穿
紛紛溺水急鈎取斬首二百班師還金珠街鱸喜誇捷小教場中開舞筵
將軍懷家乞返轡御史不從持益堅昨朝連寇半猶在巢穴未入功非全
人奴誘賊殺酋長牙旂夜報風翩翩官祠刑尸若兒戲剝淋漓談笑間
登 通郵畫縱火老稚婦女殘刀鋌官牌下令要生縛十無三四隨拘孽
臺司揭榜戒驕橫受降釋枉哀危顛南軍囊輕北軍重獵較豈是轅門偏
捷書遙聞九重喜玉旨急下飛華鸞守臣除罪各加俸相國亦賜官羅鮮
蘇清餘靈鼠絕域願還海縣民同編移文此輩早投架沿江戍兒婦扣舷
儒臣祗知贊畫寄殷勤屢乞芻蕘言真情自來幾人達湖海只慙慚昔賢
三沙誰獻暫安策民開義塾軍屯田魚鹽禁弛戰鬪息坐冷斤墩銷烽烟
邨邨雞犬映花柳婚嫁締結朱陳綠鳴琴提壺變習俗瘡痍疾固從茲痊
書生作賦紀平海嘉靖時逢庚子年玉堂太史訪邊事予詞合入穹碑鐫

關邊報步午五首

燕京書札到吳天總謂胡兵異昔年聖主河山同日月公卿那得議南遷

雲暗風高塞雁呼，鐵矛誰禦紫彤弧。何棟久陳千里策，許論論平曾画九邊圖。

太原城下虜兵屯，報騎飛書日夜奔。克罕遜稱諸部長，吉囊還號小王孫。當年胡馬入秋來，今歲南侵不肯回。數種鐵衣三十萬，角弓馳騁拂雲開。群胡燒入雁門關，興疾丁璋戰獨艱。關門可惜五千豺虎士，黃沙不見一人還。

岳山人岱

岱字東伯，先世以軍功隸蘇州衛。至其父始好讀書，開艸堂于陽山，去許市可數里。花木翳然，修竹萬挺。東伯結隱其中，山房依白龍塢，自稱泰餘山人。又以系出相臺，號漳餘子。中年出游恒岱，諸嶽泛大江，覽留都名勝，渡濤江，訪豐南，禹于四明，歷覽天姥天台，雁宕武夷，廬而返，遂不復出。性獨介，不妄與人交。能詩善画，少時題画有杏臉，因桃識蛾眉，借柳看之。句爲時所稱，作詠懷詩九十六篇，其自序以爲時序之變遷，人事之遭逢，悲愁喜樂，古今情以至贊大功，稱盛美，斯人倫追舊雨，情動于中，言形于外，所謂物失其平，鳴有以焉。爾嘉隆之間，古學漸遠，吳士爭以浮華相

尚如東伯之詠懷可謂有志者也

詠懷七首

塗山會諸侯萬國呈玉帛河精授圖讖開導由積石洪水勢方割底定于
震澤神力敷宇宙厥民得稼穡恭惟我太祖天授神聖德神文道三五聖
武靖南北唐米豈無君中原受胡厄禮樂今再新臣黎返故宅普雪百王
耻乾坤重開闢黃帝殄蚩尤周武誅紂逆二帝不足言千古功無極徵文
竝禹謨億萬膺天曆

郊外春風寒梅花正吐尋花繞樹行南枝漸三五茅齋寂無事酒力微
消午石巡稀往來樵夫及漁父依依班荆坐款款桑麻語歸鴻起荒陵黃
雲暎農扈彷彿村樹中布谷聲催婦新年擬豐稔處處鳴社鼓徘徊不能
去暮色延平楚

西北有佳人被服雲霓裳高樓切紫微輔衛開兩廂天厨挾女史華蓋蔭
文昌吾欲往從之內屏天路長窮棲在山澤左右藝蘭芳玄泉醉我心崇
桂蔭我堂南林狎鸞鷲北矚采珪璋富貴來何遲年鬢生秋霜

楚歌發中堂非爲取樂方魯酒湛金罍殷憂不可忘志士苦日短愚夫矜

夜長明燈灼綺羅廣席列芬芳彈絃奏清曲攜手醉徜徉但惜嫵婉情年
髮生秋霜不見蟬跼暮歎此蜉蝣裳

我昔游燕冀道逢邊戍子問子何方來言從北海涘陰山雪迷人冰漸生
馬尾虜騎縱復橫夾陣石與矢主師多謀猷帳下盡猛士封侯在偶然轉
戰何當已軍中多約束浩蕩返鄉里

青山貝區中謂是角里村漢代四老人避秦臥松雲白石砥如席道邊起
高墳不見采芝客千載留清芬出能安漢嗣歸復棲石門奇功不受賞拂
衣返吾真我來訪幽蘭清風繞林根山中耕植流安知非子孫

平生好雲山圖繪乃游藝筆吐造化心狀此雲巒勢變幻俾神功頃刻呈
地志烟霞出膏肓肺腑流蒼翠虛無起遙岑杳冥藏遠樹溪橋過山村迴
隔人問世往來盡漁樵荒塗少輪駟茅舍多清風仙者時游戲萬戶與千
金此樂誠不翅憂懷若冰釋不知老將至因思伏犧畫當令鬼神忘

壬子元日

北庭多芳艸秀色連深谷歲新景亦新原野散晴淑林日出東巖萋萋照
幽綠節候感春禽鳴聲在喬木田父占五行憂旱驗鷄卜去秋繁備邊誅

求罄井屋戎馬生於郊豪士多約束聖主身宵旰然矢歸嚴敵兵四百
萬詎乏九年蓄邇聞倖虜酋詭遇恐非福野老事石田拙耕在守腹師貞
丈人吉無咎慎覓陸

武陵精舍六首

紫燕銜青泥湖南事東作

一犁衝嶽雨細逐桃花落婦子餉田歸平臯烟

漠漠

湖南春雨

白石何纍纍流水亦復急茅茨對夕暉敝笱待鮮食驅翅滿漁梁鷓鴣與

鷓鴣

河湫漁梁

雨過落花深春眠懶無事起望西山雲不見山中寺日高忽聞鐘驚散雲

峰翠

西山烟寺

可憐武陵溪木白仙源水漁舟昔因緣未盡巖壑美石門今已迷月照千

峰東

桃溪夜月

鷗飛江上雪雪覆江邊竹扁舟不可渡遠望迷川陸漁父暮歸來蓑衣滿

珠玉

竹灣山艇

鳥歸山日落石壁間返照餘霞赤城標復映臨海嶠披襟坐春臺幽懷發

鳥歸山日落石壁間返照餘霞赤城標復映臨海嶠披襟坐春臺幽懷發

孤嘯金霞夕照

出萬年寺踰嶺下澗觀仙人趕石道中奇勝遂至浦口

櫛髮下層巒回望孤雲巖嶺際熒東光雲中樹莫辨清且聞哀猿澗谷知
深淺谿壑多悲風颭殿林葉卷紛紛勞應接行行得奇選百降復千升既
出還似返始謂盡崎嶇旋更得平衍婁婁樹舍霜燦燦花雲罨孤懷欲誰
語世慮忽已遣逶迤石成群奔馳若可轉汎流深叵測山逕益迂緬雖令
素心洽忍見僕夫喘浦口下歸舟川途日晡晚

秦王捲衣

秦宮春霧香秦苑亂春芳秦王寵侍妾親自捲衣裳花蹙黃金縷風生綺
繡香試看登兩袖一舞答君王

從軍曲

逐虜燕支寒屯兵木葉山秋風生馬足明月在刀環小豹隨身後飛鴻落
掌間封侯取金印生入玉門關

折楊柳

垂柳掛江頭朝朝上綺樓折來無遠使游子在邊州雨送參差淚花飛歷

亂愁蛾眉空悵望翠華易逢秋

東飛伯勞歌

東飛伯勞西飛燕玉闕巫峽難相見
春時寄書人不歸秋風一夕繞羅帷
鳴絃寫怨感孤凰含愁下機懷七襄
熠燿宵行穿落葉瑣窗燦燦流斜月
鳳樓螭水聲未終日照深閨淚痕紅

舞劍行

君不見山人平生一寶劍匣中提出三尺練
寒光射目雪不如艸堂白晝驚飛電
吾祖隨天逐胡虜屯軍黑松陣雲苦
成功策勳仗此物七十二漢何英武
十聖承平久不用四海風塵猶瀕洞
靜聽常因風雨鳴深藏恐逐蛟龍動
枯魚之宴無樂方爲君起舞當斜陽
左右回旋還自翼變擊爲刺隨低昂
黃子翩翩出介冑吾忝忠武爲其後
二家文武世不替況與吾家各親厚
舞罷悲歌薊門曲薊門桑桑眼中綠
嗚呼丈夫四十未封侯何事日日銜
杯劍應哭

新筍歌

滿林黃鳥不勝啼林下新筍與人齊
春風閉門走山兔白晝露滴鴛竹鷄

雨中三日春已過又近石林添幾箇競將頭角向青雲不管堦前綠苔破

贈程自邑

天都山人與我別遙指荆襄鼓蘭楫訪古直上黃花川思歸願出明月峽
吳苑逢君碧艸春竹林高臥少情親平生唯有三杯酒十載重看萬里人

陸郡伯談永平作盧龍曲贈之

自古盧龍郡聞君說永平風高孤竹國雪暗五花城女直秋輸馬將軍夜
發營地偏桃李後四月始聞鶯

癸未八月一日至山居

別業諧新跡林廬返故情竹添秋徑密花先早窗明地遠千家市山啼八
月鶯尋源從稚子石澗繞門清

龍母祠

石瀨淺淺山水蒼五湖祠廟接瀟湘靈衣珠佩無消息桂棟蘭檣有夕陽
白酒土人來禱旱絳幃玉女對焚香季春歲歲龍歸異千古風雲近艸堂

暮秋游眺

千里秋風雙眺自孤懷落日共悠然村居繞繞寒原外人鳥縱橫夕逕前

山寺紫烟盤曲磴石梁黃葉擁流泉比因病肺時行藥物色幽鮮一可憐

落日

讀書竟日衡門中起眺落日西南峰鳥趨返照向東嶺雁急暮寒鳴北風
修竹浮浮結暝翠踈花瑟瑟餘小紅秋山鐘磬清耳目石林隱約青蓮宮

金陵

金陵王氣斗牛間西下岷江鑠北關真主旌旗來泗上孝陵弓劍闕鍾山
鳥籠水落芙蓉冷翠柳樓空夜月閒遲暮未消游俠意秋風匹馬鬢絲斑

湘湖

隋皇昔日錦帆游吳楚分疆是此溝兩岸烟花迷賈客萬家楊柳挂新秋
北瞻燕闕三千里西望金陵十四樓淮海岷江都會地繁華雄盛古揚州

征南二首

總戎雲鳥肅風翔司馬兵符出未央春去旌旄臨海甸雪消兵馬向蠻方
漢家漠漠堯封遠天子曠曠舜日光不道野人憂戰伐月明江漢髮蒼蒼
安南易姓舊相仍封錫還應到海濱萬里版圖曾郡邑殊方小醜亦君臣
炎風毒霧煩諸將翠羽明珠入紫宸想見乞降矜面縛天威此日轉陽春

題画

暮色起郊墟牛羊識歸路牧童無枕簟但鋪明月臥

聽歌

能使新聲入舊詞秋風江上夕陽時曉來定有花含淚莫向尊前唱柳枝

重題華山圖自朝

覽画俄驚十四年墨痕山色故依然醉鄉逢鳥知何處酒量詩懷只似前

送客歸盧氏

吳門飛雪正紛紛酒煖紅樓此送君歸時射雁如相憶熊耳山高隔暮雲

山中寄張子言

獨坐空山思五陵丁香花發又逢春燈前欲共平生話月落松窗夢故人

桃花圖

竹林深處有桃花一半臨風一半遮尚憶春來三日醉曉烟疎雨臥山家

悼樂工劉淮

曾隨正德年中駕親見昭陽殿裏花燕趙悲歌何處覓旅覓飄泊楚天涯

春盡

山間石徑少年行飛盡桃花津水平只有艸庵春不去短垣修竹自流鶯

秋夜

春日青山看碧桃秋風落葉又江皋無端忽作封侯夢却是林頭掛寶刀

画

過雨溪山秋色新
携琴還有竹林人
僧房細繞巖前路
紅葉隨風打角巾

岳岱撰今雨瑤華序曰岱家世戎歟豈諳籙筆躬耕之暇竊慕古人驅

馳六義之途不忘詠歌之道遂叨藝苑見稱詞林不棄縉紳先生下交

白屋林丘高逸道合素風或千里而命駕或三運以爲隣或以忘年昔

好或以講訂昵親仕隱存沒凡一十四人並能發禪造化之微吐納風

雲之氣綺縞燦煥珠璧圓融故其灑翰託寄對酒廢和欣合怨離綠情

體物投我篋笥積歲成多嘉靖戊戌之冬岱歸山居檢閱緘素手錄成

編略加揀選又各贅述其才妙命爲今雨瑤華所謂德音不忘良有以

也明年嘉靖己亥秋七月廿有七日謹序

崑崙山人張詩別見丙集

五嶽山人黃省曾別見丙集

愁泉山人袁昭陽

雨舟王濟

時川美龍

陽山湯儒

大石山人顧元慶

嵩山徐伯胤

少溪王廷陵

袁昭陽

岳岱田寯瞻易安幽居無悶篤意盛唐詞旨清美

同陸明府過陽山訪漳河岳山人

汎舟入西山炎景照南陸梅霖歇崇岡積澗舍林麓挈徒過修坂訪友臻
空谷川薄陽已微烟霏忽叢竹石竇注清冷雲蘿覆岩屋庖人饋鮮鯉童
子進鼎餽翰墨情所投令人發深穆茲會難再洽良趾蘭堂宿

詠陽山艸堂竹贈漳河岳山人

艸堂正倚陽山曲裊裊琅玕澗水薄風塢籜辭同薛碧雲林梢長接空陰
雨晴簾捲秋如許日午開尊暑不侵過客留連盤石坐求羊應許更攀尋
寄友客北都

桃谷陸倕

石川張寔

謝湖袁璩

九峻顧聞

青門山人沈仕

字允清宛山人仕至通政尚
參議紀游詩數十卷未解

子玉梅附見

高臥滄洲驚歲晚幽棲白晝自閑情山中麋鹿逢人慣樹底鷗鳧戲浪輕
修竹蒼蒼風閣倚浮雲片片野堂明故人冀北傷千里忽聽關河朔雁聲

王濟

濟字伯雨易程人以貴爲橫州判官富而好客與劉南垣孫太初張允清
結峴山社所居有長陰閣寶峴樓圖史鼎彝奪目充棟顧元慶詩話稱其
人物高遠奉養雅潔錄其宮詞三首岳岱云善托今辭邀端古意若和宮
詞王建難稱獨步矣

宮詞三首

駕幸長春二鼓時提燈馳報疾如飛上房供奉忤多少才拭龍牀布地衣
昨日關中進荔枝君王親受幸龍池先將並蒂承金盒密賜修儀盡不知
錦標奪得有誰爭跪向君王自報名宣索宮花親自捕連呼萬歲兩三聲
游碧岩和石川韻碧岩碧弁之中峰也

歷覽碧岩勝只疑塵境無烟巒淨流翠晴瀑白跳珠隱約瞻天姥宜濛見
太湖丹青誰把筆相對寫新圖

姜龍

龍字太倉人官至副使岳岱曰天挺命世學無偏擅政理精詳神明
愷悌握兵南徵文身端德民立生祠人稱韓范國之利器考槃在阿故其
縱志名山英懷遠託巖情谷趣聊寓聲詩殆猶神龍出淵風雲自異璞玉
爲器瑚璉俱珍

登天湖山

天湖臺殿迴鳥路出人寰佛遠無新供僧閒自古顏寒泉生石井垂蔦懸
松關不緣殘照歛唱咏未言還

登上天竺閣

欹閣倚危巔踈鐘破暝烟澗迴遙帶合峰抱翠濤連無復容塵地剛餘看
月天想應風雨夜枯坐更通玄

陸倕

倕仕至郡守岳岱曰蚤登仕用無暇篇章晚就操觚遂超多士靈心夙構
穎厝居多朝夕苦吟已收時論益能守約少陵之方博施唐人之作者也

酌劉子古鏡

古鏡不自惜遺兼千里音懸之照肝胆奚啻雙南金圓質凝精光螭盤古

銘深明月入我懷聊復理吾簪與君別幾時鬢髮雪已盈冉冉悲年暮悠悠空陸沉願言保不缺報君又安心

至陽山訪岳山人

訪爾陽山曲迢迢丘壑重青冥恣遐矚麋鹿伴孤蹤高枕低雲嶠疎林度遠鐘徑餘重九菊門倚兩三松避地霧中隱鳴琴竹下逢夜長思共醉老去願相從魏闕無今想仙風自可宗因思沉涵者役役爾何庸

舍弟山亭

谷鳥鳴入啼山人過竹西樹高將宿鳳江瘳欲生霞暹暖鶯花日風和燕
子泥莫辭尊酒春州相想

早春園居

魏闕天今遠陶園歲復新杖藜吾獨往芳艸正懷人雪意頻催酒鶯啼漸入春聖朝多雨露江畔老微臣

送友游武夷

秋來天外結幽期一月看山到武夷石壁負舟仙去後天風吹袂獨吟時花深九曲烟霞寂月出千峰猿鳥悲我亦江湖從孟浪聞君長往不勝思

除夕

病拋簪紱風塵外老媿詩名五十聞華髮漸看青鏡曉艸堂重伴碧山雲
春歸柳岸啼新鳥歲晚江村帶夕暉獨酌椒花燃栢子閉門空自歎離群

湯儒

儒爲諸生于盤應鄉薦復姓袁氏父子各有集岳岱曰言論溫溫丰儀
雅妙通玄學托禪門洞庭玄蕙之山清齋獨宿堯峰四飛之頂累月彌
旬藹然交游深無淺山林之妙罕覩其人昌穀貴其討論我輩珎其情
性其於製作奚待余言

玉階愁

朱薨螢影度豔月綺疏流牛女年年會玉階今夜愁

顧元慶

元慶字大有長洲人家近許市兄弟多織晉治產山人獨以圖書自娛自
經史以至叢說多所纂述所居曰顧家青山在大石左麓山中有勝蹟八
自爲之記名其堂曰夷白藏書萬卷擇其善本刻之署曰陽山顧氏文房
王伯穀往訪之年七十五猶吟對不劬岳岱曰隱居艸莽無局促之憂好

歷名山盡逍遙之樂詞貴省潔意尚真古雖靖節田家之言浩然江湖之句時代雖遠旨趣相符爾

甘露寺

絕壁倚江濱千峰帶夕曛斷岡餘王氣古鏡隱雷文滄海風烟接高城鼓角開上方蕭索盡一塔出塵氛

獻花巖

共討花巖勝雲霄肘腋修牛峰雙角短天塹一支長松殿秋陰肅經堂雨葉黃物華更媚詠時序近重陽

山齋誦見寄之作有懷漳河

忽憶漳河子杳然有道風一尊黃葉下數口綠雲中鴻鵠心同遠若丘與不窮新詩開大雅莫惜寄郵筒

袁聚

聚字尚之永之兄也與永之俱爲胡孝思所知累試不利壹意汲古家有石磬齋蔡九遠爲之記載宋刻書裝潢贊勸並稱善本摹刻行世士林重之年近八十而沒音俗曰風儀秀朗才情超遠業雖科目志則清真齋居

晏然閒游山水文鄙近習典雅清夷翰墨瀟灑林丘帶映其於友于祿食
寡望洋之憂世俗趨卑蔑隨波之態詳其詩品德必有言

田家

誰言田家樂所樂亦豈常耕歛稍不給豐歉復相當五月了蠶事十月登
稻粟所入不償用閒少實多忙營營事公私勞苦過卽忘歲功已告畢雖
社聚一方酌酒宰雞豚鼓腹坐山陽寧知朱門內晝夜羅酒漿貧富在所
遭苦樂難較量

徐伯虬

伯虬字子久昌穀之子也嘉靖乙酉舉于鄉未仕而卒岳岱曰家尚箕裘
才兼瑜瑾凡有體裁莫不源委況其所得允合衆長靡珣綺錯之能無傷
真致之雅昌穀之文風斯不墜者矣

同九嶷顧子訪漳河岳山人

多君棲鄭圃玄室白雲陰此日逢迎處高天倚樹吟竹香明幌靜山色暮
簾深相送情無限餘音碧水琴

甲午元日

瑤極青陽獻璇宮紫氣氤晴光千嶂合陽脉百泉分門戟開黃道臺書得
慶雲青歸江柳染紅入圃梅芬花頌迴三朔糕盤五辛春杯吹綠酒不
遺瘁顏醜

顧聞

聞字行之吳邑之周山人也嘉靖中有聲公車間不第以死岳岱曰才華
殫麗鋪叙豐長究其所端靡不有自至于染翰人稱並美于孟林字山甫
少卽弃諸生隱居食力耿介絕俗獨與里人陸舒枝爲詩友王伯穀序其
詩云山當具區之漫環堵之室朝雲夕霞前榮垂蘿後戶掛瀑兒荷鋤妻
緝纒羹藜飯糗晏如也行之號九嶷山人山甫自稱兀然先生之子各有集
同徐子過岳山人

愛爾中林靜鶯啼下碧除風清徐穉榻花映鄴侯書簾際涼露切城陰夏
木虛論文竟西日片片落啼琚

和岳子嵩山艸堂冥集

綠樹覆滄浪高齋敞夕陽鳥殊聞法曲花故憶明粧碧酒衝風急清琴拂
水長况逢巖壑侶同醉白雲傍

折楊柳

芳艸接金堤垂楊綠更齊
夕絮離天遠春絲別霧迷
曲中青鏡改愁畔紫
驪嘶紅樓嘆少婦腸斷玉關西

采蓮曲二首

蘭舟終日漾蓮溪
少女如花錦袖低
含笑折來流水畔
紅粧兩兩鏡中啼
岸上企羈白馬郎
溪邊紅粉斷人腸
臨風背摘雙頭藥
笑入荷花萬點粧

晚

岸幘秋堂小
臨流暮雨清
群峰傾鳥背
落葉帶谿聲
林日高低下
川虹斷續明
棹歌何處發
應是采蓮行

清明日過楊村

楊柳蔽楊村
桃花古渡昏
清明猶作客
白日正銷魂
天地催持序
關河仗酒尊
何爲千里夢
一夜落吳門

夜泊雀鎮聞笛

雲落清河夜
天橫片月涼
江樓莫吹笛
明日更山陽

南歸道中二首

艸長花飛客路長，扁舟今日渡山陽。
笛聲吹落黃河月，淮北淮南總斷腸。
高天淮水滄悠悠，南向春江日夜流。
極目烟花傷客思，金堤明月是揚州。

附見顧孟林

夜飲王中丞元美宅

與君湖海各相違，一夕相逢酒百卮。
醉後不知何以別，醒來唯記月明時。

鍾山人昔曾被彼西方暇日爲予說所見因書以贈之

聞君昔日過涼州，千里黃河一曲流。
曾見西山遮虜塞，雲間孤戍爲防秋。

王延陵

延陵字子承，文恪公季子。以父廕爲中書舍人，風流好事，有秦川貴公子之風。早歲城居，與皇甫子循、張幼于結社，有春社編詩曰：王中舍集游戲丹青，亦有可觀。岳岱曰：廕補清要，弗習純綺，尚山岩，刻意長吟，宦游南北，歷覽山川，雅思清詞，珠輝雲泄，高明日造，至止難窮。

滄洲漫興

沙白柳陰薄，潮平舟楫輕。
天開雲錦麗，人傍日華行。
雞犬村墟午，鷗鳧社若晴。
金尊開欲舞，回首憶神京。

王大史張比部同登翠微閣

石磴千盤轉山樓百尺餘窗虛一雲自入春暖柳將舒玉竿浮金液瑯瀾俯碧虛叨陪太史宴辭賦媿璠璣

虎丘分詠得浮圖

寶塔倚秋穹珠林望綵虹雲嘘細戶白日落綺疏紅鈴語振天外龍光盤壑中不有九霄陟能令五蘊空

洪光寺同崑崙山人

洪光高閣杳林端繚繞雙過錦繡鞍曉日乍開仙闕曙春雲猶弄上方寒窗中猿墮青天影樹裏人行赤玉欄已分息機甘晏寂長安風霧任漫漫

沈仕

仕字子登自號青門山人杭州人岳岱曰身本貴介志則清真野服山中浪游海外新篇雅調遠邇齊稱翰墨丹青兼能游藝王道思序其詩云予聞沈青門于顧東橋以爲江湖詩人第一流也今年冬訪予海上盡出其詩卷觀其樂府古詞雜詠游適之作至于覽觀京都恭覲今上制度禮樂之鉅盛擬議應制形容功德頌美摭華麗而有則益君故少司寇省庵公

之子習其家學闢國家之光而講中外政俗之變非生于窮靈僻者比也君恂恂恭勅風致藹然邊關諸詩意氣激發溢于聲律之外豈其濩落無用雖託以爲佚而雄心俠氣猶不能自釋耶

村居春日

柳堰迷春日蓬扉啓綠烟人閒啼鳥外興劇落花前野色連三迳山光滿四筵鷓鴣隨可解堪作酒家錢

雲厓久客川中江上偶懷

風吹山色不生雲日照澄江散綺文空憶巴陵三月酒鷓鴣啼處一逢君

山寒

符傳出葡萄星郎上郡豪五營分貝冑萬騎擁旄旌野日寒如月河水聚若刀凶門隨命擊仗勝有龍韜

王較書樓登

稱登字伯毅先世江陰人移居吳門十歲爲詩長而駭發雕香刻翠名滿吳會開嘉靖甲子北游太學汝南公方執政開試瓶中紫牡丹詩百數有
色借相君袍上紫香分太極殿中烟之句汝南賞歎擊節呼詞館諸公數

之曰公等以詩文爲職業能道得王秀才十四字耶引入爲記室較書祕閣將令以布衣領史事不果而罷汝南卒無子伯穀渡江往哭其墓丁卯復游長安華亭當國頗修姚張之怨客或戒伯穀毋自白袁公門人伯穀謝曰馮驩任安彼何人哉刻燕市客越二集備書其事所以志也伯穀爲人通明開美妙于書及篆隸好交游善結納譚論娓娓移日分夜聽者靡忘佐吳門自文待詔歿後風雅之道未有所歸伯穀振華被秀噓枯吹生相詞翰之席者三十餘年閩粵之人過吳門者雖賈胡窮子必躡門求一見乞其片縑尺素然後去中少師以元相里居晚年頗交相推重軒車造門賓從填咽兩家巷陌殊不相下伯穀擗引寒素敦篤故舊王弇州歿其仲子士驥中鬻語連染繫獄伯穀傾身援救有古人風義不但以文彩見重也伯穀少子留字亦房有雋才將刻其全集會病卒不果曹能始攜歸閩中未知已刊行否余年及壯伯穀猶健飯數相聞而不往謁昔王弇州自言少時與文待詔周旋而意殊不滿晚年爲作傳可當一懺悔文余當世而失伯穀其悔有甚于弇州錄其詩徬徨太息不勝中郎虎賁之感又恨無弇州之筆補此闕陷也

鳳樓行

以下晉書集

鳳樓翼翼開天居故老相傳百載餘過客遙看黃幄座侍臣長奉紫泥書
碧窗齊臨石脾睨朱棟或画金龍魚嗚呼成祖勞開創金扉翠牖何雄壯
八聖龍飛撫御牀千官虎拜瞻仙仗今皇有道如先皇垂衣日日開明堂
祝融胡爲太亡賴炎火頃刻令飛揚雷霆雲雨尚不息入力何以施剛強
玉陛千尋碎如雪千人萬人爭吐舌大內深嚴孰敢窺九陌惟聞棟梁折
蓬萊雙闕中天起射日雕甍倏然毀白頭內監難走藏紅顏宮女多焚死
御柳宮花赤焰中金輿玉座寒灰裏古今災變那有常成湯旱魃堯洪水
天意由來本至仁朝廷豈乏臯濩臣卽今修省行何政旅客心勞日問人

觀潮歌

丙辰閏七月初吉孟瀆江邊潮水赤寒波帶雨打空城高浪如山排巨石
山田旱燒不可救山人荷鋤惟種荳游魚忽入葦花中江裏鼉鼉近人吼
隔岸不聞雞犬聲前村盡說蛟龍鬪白頭田父向人語不見江湖大如許
門前堤上種柳樹潮痕深淺能記取去年堤石未沉沙今日柳枝齊拂水
蒼烟黑霧黯不收吁嗟身世如浮漚牀頭水鳴得赤鯉檻上雲生飛白鷗

臥椅人力不可運，眼中倏忽隨波流。魚舟葉葉爭出沸，踏浪高歌似平地。
北客初聞忽膽驚，南人坐對猶見戲。我聞錢塘之潮天下無，素車白馬相
喧呼，鐵箭如沙射江許。錢王當日真雄圖，書生白首老牖下。只尺不辨越
與吳，嗚呼！只尺不辨越與吳，酒酣耳熱歌易易，不能三江卽五湖。轍中之
耐胡爲乎？

寶鏡篇

舒生寶鏡卅堂前，錦囊又于明月圓。雪光輝輝照肝膽，流蘇風颯朱繩懸。
青銅千歲化玄玉，聲如金磬清悠然。龍文不斷細如髮，天吳海若紛糾纏。
夏王九鼎鑄神怪，無乃祖此相流傳。徐君愛鏡如愛劍，胡僧海客求識面。
玉匣時時風雨鳴，翠奩忽忽蛟龍戰。嗚呼！人事豈有常，徐君白骨烟荒涼。
此鏡舒生買歸越，轉展胡廼登斯堂。摩挲反覆辨世代，未必秦漢將無唐。
唐人筆勢彷彿晉，蠅頭小字題其傍。或隨龍馭蒙葬地，玉魚金盃同深藏。
不然妃后殉紅粉，斷岡落日埋清光。秦圖漢寢今誰識，騏驎石馬眠荆棘。
畊人拾此意茫昧，青錢斗粟輕棄擲。流傳吾意任來去，神物不受相秘惜。
嵩高少室山萬重，秋風桃竹訪赤松。寒輝繫肘照幽壑，魑魅不敢窺塵容。

亦愁變化不可測豐城神劍終爲龍

海夷八首

嘉靖甲寅

長洲茂苑只空名休道吳王錦繡城粉堞雲昏朱雀幟黃金日調水犀兵
夕烽看憶桃花色戎角聽疑玉笛聲伍相祠前斜日裏土人鷄黍祝昇平
玉山前歲困倭夷今日華亭更可悲沙月如水澗白羽海烟爲霧暗朱旗
石頭已道朝烽合揚子仍愁暮角吹財賦東南憂不細廟謨何以定安危
吳王城外石湖邊雲白山青花滿烟却憶中丞持鉞過自驅猛士滅倭年
白虹貫日天文動金字班師國計偏鳥盡弓藏千古事野人臨水淚潸然
隋帝巡遊伯業亡邗溝流水月蒼蒼錦帆一去知何處翠柳千屯自曉霜
江漢風塵多兇窟維揚豪傑盡龍驤可憐仗劍唐司馬良翰天教翊聖皇
金陵亦是開基地虎踞龍盤舊業存先帝寢園猶白鹿功臣甲第自朱門
冶城烟壘秋風肅淮水金鏡片月昏太傅元勳藏上冊肯令妖祲近中原
五溪戎卒本諸蠻木弩銅機出萬山鐵騎悠悠屯海上黃金日日出民間
爾曹荒服元亡賴此日王師獨厚顏頭白土官尤跋扈戇玳筵紅粉不知還
任公瘦骨氣蕭蕭亂後彫弓却在腰銅柱未曾標爲援玉門早已入班超

孤身去國心應折，群盜經時氣轉驕。
聞道墨緣重奉詔，佩刀騎馬答清朝。
錢塘雄盛比姑蘇，宋室南遷是帝都。
處士梅花經戰馬，美人楊柳失栖烏。
翠華輦路雲俱斷，白馬潮聲海半枯。
惟有將軍青塚樹，枝枝南向野鶯呼。

無題五首

一朶千金泣露斜，簾櫳難護幕難遮。
吳王城上同看月，伍相江邊獨浣紗。
楊柳名爲離別樹，芙蓉號作斷腸花。
舊時隣舍俱新主，莫辨東隣是宋家。
昔日吹簫鳳下來，如今鳳去只荒臺。
劍分安得重歸匣，水覆難教再上盃。
倚酒禁愁何日醉，待花消恨幾時開。
無情最是窗間雨，吹入空牀生綠苔。
自從抱瑟入朱門，新窈安能易舊恩。
明裏開顏暗流淚，面前行樂背消魂。
傷花見說渾無色，鴛鴦傳來不肯言。
知在闌干第幾曲，青天何處覓崑崙。
芙蓉江上露淒淒，楊柳樓前月影低。
燕入朱門藏不見，馬過花巷憶還嘶。
藕絲無力終愁斷，萍葉隨流不肯齊。
信有銀河千萬里，人間隔斷路東西。
玉釵中斷兩鴛鴦，繡枕平分半海棠。
戲擲櫻桃奩尚在，學吹楊柳笛還藏。
紅顏夢裏將爲石，青鬢愁中易作霜。
錦字消磨鴻雁絕，門前只尺是衡陽。

古意四首

以下金昌集

珊瑚秀海底，游人涉中流。曾不盈尺寸，采采無遺留。瑣細安足珍，空勞使
者求。煌煌十尺枝，燦燦若靈虬。根生龍窟中，鐵網不能投。千年龍一飛，滄
波與之浮。奇寶出世間，東序陳天球。河圖及銀鬪，赤刀以爲儔。尺寸終棄
捐，輕擲如蚍蜉。不能飾楣楯，安足登晷旒。昔爲盤中珍，今焉道周
楹。虎不垂頭籠，鶴不委翼兔。爰雜耿介牛，順而羊逆梧。桐茂高陵裡，柳主
下隰物。性各有托，焉得相變易。渭川玉波澄，涇河泥滓流。爲木本同源，滯
濁不相侔。悠悠儒子歌，宜尼爲遲留。

桓桓班生志，矯矯龍虎姿。朝爲白面生，夕建交龍旂。繁星麗七首，四馬寫
廬馳。蕭蕭玉門關，胡笳不敢吹。靈鵲化金印，紫綬腰間垂。天子封公侯，舉
世稱男兒。嗟嗟楊子雲，骨若柔桑枝。不能一鷄縛，焉能斬郵支。奇書滿腹
中，不值修文時。白首太玄經，命也復何爲。

千金兩吳鉤，秋水爲鉛鋒。人血濺其上，寶鏗明芙蓉。割魚千萬里，不得屠
龍屠龍豈不能，惜哉委塵埃。析薪刈青松，棄置良足哀。一旦成銷折，不
能斷青苔。英雄困平世，伊管迺凡才。

查翁琵琶天下聞奇妙不數康崑崙六月虛堂發清響泉鳴木落浮雲昏
人言琵琶出胡族君今彈之憂哀玉邊雨夜裂交河水朔風秋折穹廬竹
沙漠呼鷹雪未乾混同吹角波新綠繁聲亂指隔屋聽賀蘭秋高山霧青
鬪頓按歌嬌學鳥燕支奏樂碎如星蕭蕭楊柳落羌管滴滴蒲柳瀉玉瓶
有時閑緩未促柱谷幽人寂風冷冷我聞琴門段和尚此技從來稱絕倡
寥寥曠代法不傳清江白月空惆悵紅簫玉笛清可憐君言聽之如蝴蝶
十八盧陽過鐘二尋師不惜黃金錢藝成彈向錦筵上商哀羽烈悲青天
長安繡陌知名遍春風夜醉芙蓉院翠黛人人乞譜傳朱門日日開尊燕
司馬青衫淚泣珠明君紫塞沙吹面秋色侵衣鐵撥消寒烟濕指檀槽變
古來能事惟貴精一藝可以垂芳名山陽三弄桓伊笛緜嶺千年王晉笙
君今此曲掩前古恍惚變化真希聲余也江湖好竒士挾策走馬咸陽京
正逢天子射蛟日竒文落落無所成學書學劍日暮短裘高帽吳王城願
從君受調指法燒燈夜讀琵琶行

夢君篇贈黃文煇父

童君秀骨青厓開蟠胸大壑藏風雷沈郎嚶嚶號任士古心清氣空塵埃

明珠翠羽盡奇寶，二子落落非凡才。空堂日暮發遐想，建安數子千年上。
嗚呼王者久不作，大雅由來稱絕響。國朝博士真天人，靈芝煌煌發土壤。
墓門荆棘祠廟荒，後來作者江夏黃。知君十載未識面，雲霞秀句今方見。
黃鐘玉磬音調絕，疑然獨立靈光殿。瑤華入手海霧濕，夕陽無人風颯颯。
孤城鳴蜩燈火暗，破屋翠巖山鬼泣。君今名重天下聞，躬耕不就劉將軍。
桃花茆屋長洲死，閉門枕席生浮雲。青袍恥逐路傍子，擊木狂歌鳥獸群。
嗟嗟圖南九萬須，我輩槍榆亦鷄安。足云童君長嘯沈郎去，偃臥松牀卽
夢君

過方丈園亭

舊別雪麟鱗重來，及仲春馬能穿綠竹。鶴亦認烏巾，山沼松舟小春茶石。
窻新鹿門堪避俗，他日願爲隣。

寄方子時二首

之子臥幽谷，相過歲暮時。呼童穿馬碕，貰酒出龍池。生事惟樵斧，年光有
鬢絲。梅花開儻徧鷄黍，不須期。

避人成獨往，一室謝喧囂。泉近書聲碎，山深酒價高。千峰對茅屋，終日聽

松濤五畝瓜園地躬耕莫憚勞

龍母廟

松塢石林林秋風萬壑陰泉清塵客耳花照定僧心龍去野祠破鳥啼山竹添蒼生饑渴甚朝夕望爲霖

雲泉菴聽僧吹笛

吹笛破山翠蕭蕭夜壑停一聲杯上兩萬感鬢前星斷續音成梵多羅曲是經雖無楊柳落淒怨不堪聽

白丈自杭州歸要遊天池

桃花零落盡游賞與君同僧住松聲裏鸞啼石壁中巖光晴處紫池色晚來空莫把琵琶奏尊前有白公

虎丘寺看妓人走馬

駿馬龍駒種佳人燕子身馳驅下夕坂險絕太驚人血是蹄間汗香爲鬢裏塵解鞍慵不語游子替傷神

陳僉憲園林

十畝瓜園地因之早挂冠衣裳竹裏翠門巷雨中寒夕鳥留歸聽秋花耐

醉看多君下榻意不忍負餘歡

天池看月

禪心何處是窓裏石蓮峰池黑松千片崖深月一重山光寒客劍霜氣入
僧鐘憐取婦娥意清輝照病容

任公祠

蕭蕭遺像鎖荒祠尚憶孤身百戰時諸葛事繁那得久留侯顛弱到今疑
絳帷香氣衣冠暗石棟斜陽薜荔垂曾是當時騎馬地烟中往往見旌旗
癸亥元日

新春感事

殘臘陰陰雨滿城今朝元日是新晴酒樓日凍南山雪柳岸天寒遠墅鶯
寶劍千金五陵俠銀箏一柱十年情從來王粲多流落問舍求田只未成
信有清風不厭貧吹簾入幌轉相親紅顏薄命空流水綠酒多情似故人
服藥難辭星入鬢閉門長與竹爲隣黃金散盡真堪惜前日親知是陌塵
種荳

庭下秋風艸欲平半饒種荳綠陰成白花青蔓高於屋夜夜寒蟲金石聲

華陽洞 采真稿

百畝丹崖秀玉屏山深日暗書
冥冥黃冠指路香先入蠟炬穿雲火半青
仙家白鹿行千里洞口青天似一星
安得真人開石壁雲中鷄犬洞中聽

看梅過玄墓山中二首

以下梅花什

人似梅花瘦舟如蘭葉長青山
十畝白流水一春香種密人難入開齊夜
有光苔枝容我折野老不嗔狂
橋外花開日分明雪作圖不將
他樹雜未有一家無多處半青嶂香時過
太湖瀾醜元易得市遠亦須沽

湖上梅花歌四首

家家山色對春湖日日春風聽
鷓鴣門前楊柳藏魚市屋上梅花當地租
山烟山雨白氤氳梅葉梅花濕
不分渾似高樓吹笛罷半隨流水半爲雲
虎山橋外水如烟雨暗湖昏不
繫船此地人家無玉屏梅花開日是新年
聞道湖中盡是梅兩山千種一
時開估客片帆春雨裏載將香氣過湖來

支硎寺看梅聽僧家吹笛

梅引何郎興山餘支道名寒泉
似隴水僧笛學羌聲一雨花林寂無人山

殿清年年二三月繁麗不堪行

天平道中看梅呈陸丈

新春日日雨霏霏雨後尋春願
折從野岸俱無主開入僧家盡
附見河南陸承憲看梅原偈三

約王子看梅

梅花動山意野客不勝情長夜
能輕卽遣山陰權選同雪裏行

夜過沈子起邀去看梅

湖光已微綠梅萼亦多時一月
前期莫道休文病蘭橈清夜移

湖上梅花

不獨山中有還從湖上偏全將
氣鮮山僧閒閑坐相對一蕭然
新秋飲顧汝所齋中夜

不違花近翠微苔作樹人行香徑雪生衣
擗扉誰似丈人能好事衝風踏凍不言歸
首

思瓊樹青春懷友生雨中開欲盡風處落

僧高臥滿城人未知恐消枝上雪故作雨

雪嶂影倒盡玉湖天花落鷗群亂香浮雨

端作以下無市集蘇坊明子

青槐樹樹烟客舍花增邊歲馬飲秋雨短衣行暮天芙蓉思故園蟋蟀感
流年何事長相見歸來又惘然

奉答汝南公

平津閣上夜題詩繡履親裁與項斯字比官雲俱五色情將禁柳共千絲
袖中攜出香偏入馬上看時月故隨自是陽春元寡和其言築屋報書遲
雨中寄顧汝和舍人

花間小雨濕衣輕夜半思君隔風城尚食官監邀翰墨射聲校尉識書名
齊廢西畔濡毫待香案前頭捧硯行漢武若言封禪事茂陵今已著書成
答袁相公問病二首

斜風斜雨竹房寒雲裏蓬萊枕上看愁過一春容髮吟成五字帶圍寬
書生薄命元同妾丞相憐才不論官泣向青天懷烈士古來惟有報恩難
形骸土木佛燈前黃閣情深有夢牽喘似吳牛初見月瘦如遼鶴不冲天
詩題半作逃禪偈酒價都爲買藥錢知已未酬徒骨立一生孤負佩龍泉
將游甬東王青州伯仲見過作以下容越志嘉靖丙寅

主人出門去客子入門來主人爲客留若下花前開借問客謂誰東海王

青州一變明月珠夜照滄溟流人言王家太難直灌夫醉罵程不識我謂
王家無世情孔融爾汝禍正平烈士肝腸鐵一片安能盡逐時人而時人
面好心如雲白衣蒼狗須臾變問我馬何白問我車何素知君兄弟有心
者我爲悲辛述其故前年射策游都下腰佩蒯緱騎瘦馬黑裘半敝難告
人朱門欲謁無知者汝南相公識我早握手交歡盡傾倒此日都超真再
生當時項斯何足道吟成五字念頭風奏罷一篇網羅濛濛常未遇不自
憐及至相逢方覺好傾都聞知聲噴噴紫閣金門皆接席殿中薦作校書
生儔上推爲題柱客刀環築開司隸門馬蹄關入金吾宅勸陵醉尉不敢
呵半夜彈箏洛陽陌從來人事有變遷從來結交無百年我旣還家相公
沒長齋繡佛學逃禪貝樹爲庵深巷裏芙蓉起塔小堂前翟公門第寒如
水薛公賓客散如烟千金寶劍何人是一束生芻若箇邊今朝絮酒兼炙
鷄明日千山與萬谿別君不是無雙淚留向陳蕃墓上啼

宗將軍戰場歌十首

宗將軍名禮關中人官游擊將軍馳騰善戰約束士伍有古名將之風徐
海入犯提兵扼皂林阮中丞在桐城嬰城自守將軍以無援戰沒朝廷贈

官官其子有司立廟戰場榜曰忠魂殿下士能談故侯將略往往爲之雲涕以此人知其得士心也

月黑咄人語隔河見白馬知是精靈歸來向廟門下
河邊枯燭燼金鏃射爲窟入時何太深碎骨始得出
圍中鼠雀盡城裏日傳食爲鬼已滅賊何時滅賀蘭
本謂江南樂佩刀居帳下漁陽飲飛士無一生還者
將軍空血戰中丞深閉門桐鄉城北路流水沒孤屯
故劍不可收姓名刻劍匣瑟瑟白楊根虛空塞金甲
射盡白羽箭戰士不肯去春來艸痕赤舊日留血處
有家全募士無骨可封侯負却生時相班超是虎頭
結髮爲飛騎相從霍冠軍征南諸將士枯骨論功勳
沙場大黃弩將軍在時射賊人得之驚一挽一百石

舟中與建初話舊

十載行藏半未齊聞君論舊益凄凄汗從何晏朱衣拭書覓羊欣白練題
歌是竹枝容易和淚成珠子不輕啼干將已是徐君劍明白扁舟下剡溪

石門曲三首

椶桑復採桑，鷺長桑葉齊。妾住石門東，郎住石門西。
盤成桑葉空，門前青苧長。一半織郎衣，一半結魚網。
貧絲家復貧，哭解紅羅襦。將絲貫妾淚，可得作明珠。

塘栖

水湖雨浪濱，飛帆去不停。人聲雨屋斷，魚市一江腥。雲已辭吳白，山初到越青。侯生數行淚，千里弔玄經。

錢塘夜泊

孤舟三日雨，淙淙夜泊錢。家舊建邦桑，過石門青拂枕。水經攜李鯨，舍窓六橋花盡休。攜酒五月湖平好，渡江此去報恩慚。烈士匣中龍劍氣，難降

送陸文移官海豐丞

官舍有餘清，無言政未成。頭從湖上白，水在橈中輕。過魯無魚食，歸吳借馬行。簿書期儻暇，一問濟南生。

李舍人孤山艸堂坐雨

筍輿行過斷橋來，樓上銀罌水上開。白鳥數行猶似鷓，青山五月已無梅。

雨昏不辨絲千縷湖綠渾疑酒一杯幾欲題詩題未得令人元是謫仙才

贈顧杭州貞叔

才高誰識顧君平身著青袍世所輕楊柳不曾湖上看芙蓉元在幕中生
馬頭雲斷家山色官舍潮連夜雨聲流水白雲心盡折丈夫辛苦爲微名

紫陽庵丁真人祠

丹壑斷人行琪花洞裏生亂崖兼地破群象逐峰成一石一雲氣無松無

水聲丁生化鶴處蛇骨不勝情

麻坡丘太守齊雲有一樹一花色無時無鳥聲之句生平以爲獨絕不知其本於僧說也

會稽道中

江東名郡古無雙處處青山照玉缸竹箭一流明客枕芙蓉兩岸夾鬆窗
清猿夏斷稽山廟急雨朝平孝女江此地何須歎淪落買臣頭白始爲邦

哭袁相公二首

淚痕如雪薦生芻千里風塵酒一壺伯道遺孤安得有中郎少女亦曾無
麒麟乍刻惟新塚烏鳥空啼是別雛生事蕭蕭何必問坂田磽石半無租

鶴飛蟬蛻總成塵，欲報明珠未得伸。山上杜鵑花是鳥，墓前翁仲石爲人。
黃腸詔出東園賜白骨，家餘南巷貧爲問。翟公門下士，死生誰箇見情真。

雨中同諸君游東錢湖

亂厓層壑水粼粼，一見漁舟一問津。修竹到門雲裏寺，流泉入袖雨中人。
地從南渡多遺恨，湖比西家亦效顰。酒似鵝黃人似玉，不須深歎客途貧。

平望夜泊四首

魚鱗成石量，系縵論斤賣。珍重繚網難，家家月中曬。
雨多楊柳爛青筐，滿山市兒女當女冷。嫣然口唇紫，
月下壓酒聲。將舸繫楊柳，明日到家近。不須沽一斗，
店傍栽紫薇。顏色翻江霞，我家庭下樹。端日正開花。

還家作

游子江東倦行役，還家登堂艸盈尺。花枝三樹四樹紅，頭髮一絲半絲白。
囊中猶自有殘錢，盡買楊梅飽食眠。門外幸無騎馬客，清香細雨佛燈前。

贈崔丈四首

以下燕市後集除慶丁年

翟公方得意，結客何紛紛。冠蓋填巷中，一一皆青雲。芳蘭雖被鋤，未嘗易。

清芬胡爲平生交落落不相聞門外寒轍迹暮雀空成羣昔亦一翟公今亦一翟公世情如浮雲朝異夕不同路傍桃與李芳菲競春風不如南山栢青青歲寒中

英雄不可測屈伸隨其時以彼英雄人亦俟英雄知白龍爲魚服群魚反見嗤君昔處東海浮沉人不言翩翩游帝京實從多華軒五侯奉下風七貴昔掃門黃金白玉璧贈者不爲恩壁以前爲壽金以置酒樽

君懷一片心皎如春江月推心置人腹安得有胡越雙鍰雌雄龍報恩未出匣季布誠小諾朱家非大俠我昔游燕山丞相禮爲賓世皆重丞相非重幕中人今求丞相亡相弃如飄塵惟君重意氣不改平生親悠悠世上交焉知雷與陳

長安多青樓月出吹笙竽上有倡家婦下有酒家胡十五十六人雙雙笑當壚齊姬善擊鞠燕姬善擣蒲左挾外黃女右擁邯鄲姝美玉不爲白胭脂不爲朱天然芙蓉花顏色與世殊與君各青鬢及時爲歡娛安能局促行學彼轅下駒

志哀寄吳氏二首

翺翺枝間雀，譙譙委道傍。上爲鴝鵒啄，下爲螻蟻傷。仁者過其側，拾之歸青箱。飼以黃金花，五內皆馨香。瘡痍日以平，羽毛日以長。朝棲主人門，夕宿主人堂。此雀銜玉環，將以報主人。一朝嬰世難，主人歸黃塵。徘徊空庭間，肝腸多苦辛。擾擾行路子，此情安可陳。

鷹鷂擊衆鳥，衆鳥無能爲。胡然墜蓬蓬，自損風雲姿。雖稱六羽翮，零落何所施。蓬蓬小有毒，螫人人不知。昔爲衆鳥畏，今爲衆鳥欺。旣言覆其巢，又已攫其兒。覆巢猶且可，攫子當如何。哀哀三黃口，泣血紛滂沱。好生上帝德，無乃傷天和。誰爲訴九閻，三而去網羅。

碧雲寺月出贈朱十六短歌

燕山一片月，夜照白蓮花。千里萬里同，爲客三人五人。齊憶家與君，俱是悠悠者。意氣相逢不相下，平原俠士能關鷄。邯鄲才人堪換馬，明星落木亂紛紛。同向山中臥，白雲秋風乍起黃。花窠明月初生青，艸墻齊門彈瑟。相知少漢庭，執戟郎官小。漸離筑傍流，水立干將劍。上青虹，繞才子風流。多落魄，青樓狹邪。善譜謔，趙玉刻就瑩。後村蜀繒裂，作鞞繩。索禪燈，繡佛夜厭厭。牛醉能歌阿鵲，朱公大笑普金盞。三十青衫一孝廉。

送孫明府之崇明

昔年芸歌侶，鳧向南征官。俸魚租入衙，齋廚氣成間。程看日出到海聽，鷄鳴地僻無官長。何須束帶迎。

送王和仲歸吳門

三載都門客，秋風憶故山。楚雲裝共薄，燕艸鬢同斑。歌逐無魚斷，身隨一雁還。祇應留滯者，別淚易潺湲。

駕幸太學恭述

璧水鉤天樂，橋門鹵簿車。秋風清道早，朝雨灑塵疎。檢禮惟行菜，談經亦墜魚。不知稽古士，獻納更何如。

迎春日集華光祿齋中

椒盤出五辛，下馬拂黃塵。千里周南客，明朝漢苑春。艸生將去路，花待欲歸人。君有陶潛祿，猶勝季子貧。

元日都門看早朝二首

春日滿皇都，春雲乍有無。五更齊玉佩，萬戶共桃符。天出臨軒詔，山當遶殿呼。欲知王會禮，先問漢鴻臚。

萬國盡朝宗。天門發鼓鐘。樓成五鳩鵲。闕是兩芙蓉。賦待凌雲薦。書堪計日備。不如隨仗馬。猶得近飛龍。

十三日看燈市

香氣與人烟。紛紛使少年。花過樓外看。燈出市中懸。若箇春無怨。誰家夜可憐。可知愛惜月。越未十分圓。集本云不知人共月能到幾時圓

碧雲寺泉上酌酒與朱十六

雲中流下不勝清。石瀨濺濺只自平。宛轉浮杯人不醉。潏潏到枕夢難成。分厨已足千僧汲。出寺能爲十里聲。同是黃塵騎馬客。與君相對濯冠纓。

聞警

交河十月水潏潏。騎秋高過黑山六。郡平時元近塞。一夫誰箇可當關。雲中太守須重起。日逐賢王未肯還。空抱平胡二三策。書生無計謁龍顏。

出塞

幕前旗鼓殿前分。笛裏梅花處處聞。秦地護寇諸校尉。漢家出塞五將軍。祈連山下烽如月。無定河邊陣是雲。爲問朔方豪傑士。幾人年少立功勳。

贈徐舍人

嗟君何事獨沾裳聞着烏啼黯自傷池上薇花空澹月堂前萱艸不禁霜
燕山雪作愁時髣楚水猿爲客裏腸見說王褒廬裏處滿林衰栢淚痕蒼

湖上

鷓鴣荷葉滿秋烟太液潯沈處處連碧浪半湖雖似鏡銀鞍十里不如船
堤同隋苑能栽柳歌久吳姬憶采蓮不爲無魚思故國他鄉風物本悽然
下第蠶書懷呈納言姜公

鳳城簫鼓夢中聞天上人間自此分鄉路三千俱是木世情一半不如雲
邨人歌後非無曲黃馬空來尚有群君在漢廷司獻納肯因流落薦雄文
至日懷諸太史陪祀南郊

園丘馳道艸芊芊曠典重逢御極年聖壽長如南至日皇恩高似北溟天
霞灰應氣迎鄒律松籥合風入舜絃最羨翰林供奉客揮毫先進慶雲篇
寄蔣長康

十五年前傅粉粧家家持菓擲潘郎不知別後顏如土卽恐秋來髣有霜
夜奏鳳凰調蜀女朝闈峽蝶學滕王如今不及當時事客散呼鷹竹滿堂
袁相國故居訪李孝甫太僕

魚文七首不離身馬踏長安市裏塵重過楊家舊亭子深悲侯氏老門人
朱欄易主花無色青眼逢君酒可親同是中郎琴畔客一般憔悴各沾巾

思歸寄皇甫司勳

射策上書俱不遇秋風夜夜夢歸吳花憐觀裏無多樹柳憶門前第幾株
趙女怨爲廝養婦魯生羞傍叔孫儒惟君青眼能如舊不笑終軍手裏繻

玉皇閣對雪懷黃文淳父

雪後登樓興未賒仙人香案挂寒霞帝京初曉渾如玉宮樹先春已著花
人意喜時消作水馬蹄行處踏爲沙黃公墟畔新醅綠游子如何不憶家

長安立春日

城上高樓五鳳凰春雲春日轉年芳鏤金作勝家家帖剪綵爲花樹樹粧
太液池中波早綠昭陽殿裏柳先黃隴梅消息無人寄斷盡江南思婦腸

贈翟德甫

長歎年年意若何及時行樂肯蹉跎往來朱邸風流甚出入青樓薄倖多
桃李可憐江上渡柳枝如怨笛中歌黃金未盡客顏在莫問門前雀可羅

正月十六夜長安步月簡朱少傅

少年場上立黃昏一片歸心不可言月到今宵微有魄人從何處正消魂
桃花騎出胡名馬竹葉攜來魯上尊只隔一重燈影裏布衣那敢扣柴門
清明日韋莊送朱在明南歸

清明對酒共天涯欲贈龍泉轉自嗟送別消魂惟柳色笑人歸去是桃花
園林一曲仍韋氏兄弟多才比謝家可惜卞和懷白璧青衫濕盡出京華
送吳中丞之金陵

建業青山是帝都慙勞開府握軍符花間朱鷺鏡歌曲江上黃龍水陣圖
玉節中丞新豔寇樓船諸將舊平吳不知燕子磯前地容得陳琳艸檝無
弘教寺三首

先朝行殿作禪宮黃屋青山本是空聞道一人曾駐蹕山僧不敢住當中
內家金像出蓬萊千葉蓮花玉作臺試向白毫光裏看聖人前世是如來
宣皇在日寺新成萬乘親來寺裏行芳艸也知無玉輦秋風秋雨滿階生
望湖亭

亭邊楊柳水邊花落日行人正憶家不及江南湖上寺木蘭舟裏載琵琶
訪董述夫不遇

扣戶無人問四隣蕭然木榻滿黃塵知君只在長安市西得燕山賣與人

長安春雪曲五首

春風吹雪下秦乾添得城中一夜寒鳩鵲樓高消不盡長安街上馬頭看
一半秦聲半楚聲秦娥調瑟楚娥箏鳳凰城裏家家雪但是紅樓凍不成
御柳黃絲未滿條宮花紅紫不勝嬌至尊看雪開温室親賜昭儀壁上椒
煖玉琵琶寒玉膚一般如雪映羅襦抱來只選陽春曲彈作盤中大小珠
勒寒桃李未成蹊啄雪流鶯已自啼進得貂裘渾不着聖人春日賜征西

題董生春山障子贈朱金吾

董生留我子雲亭画盡春山酒未醒贈與侯家金屋裏美人筵上鬪眉青

都下寒食

騎馬尋春尚遲東風空自向人吹燕王城裏千株柳寒食來看未有絲

昔者行贈別姜祭酒先生

以下青雀集陸慶丁卯戊辰

昔者薄游燕王都燕人貴駿皆買圖汝南袁公善相骨稱我一匹桃花駒
是時先帝論封禪焚香日坐蓬萊殿二三元老書不停記室豎儒供筆硯
袁公手內金花殿口召土生生不前安知徐福三山事但憶蘇秦二頃田

我欲東歸勸我留滿牀詩艸盡見投見時醉操銀不律雌黃爛熳珊瑚鈎
以茲感激國士知新舊存亡不可移季札匣中鏤鄒劍脫挂徐君墳樹枝
浮雲世態那堪說衆人聞之皆不悅謝傅西州春艸深半巒涕淚空成雪
贈刀人結襪子可憐貧時交一生與一死召公已死周公噴道傍之言未
必真馮驩不去反見忌天下盡諱爲門人宗伯中丞本愛才乍聞此語亦
徘徊惟君知我有心者肝腸傾倒無所猜校書舊物許荐我君縱殷勤我
不歸子虛欲奏雖未成知已難忘楊意情長安國門同日出我婦金闈君
石城壁水曾經黃屋坐祭酒胡牀尚虛左首翁先生三數公桃李門人千
百箇紛紛入貲同舍生春秋俱服左丘明君行未可輕此輩萬一中間有
馬卿

奉寄太師成國朱公二十八韻

先帝垂衣久元公翼戴長宵廬明月殿曉衛白雲房賜馬行長樂看花宿
未央常陪五時祀獨奉萬年觴出入鈎陳側馳驅太乙傍幾株溫室樹廿
載御爐香不離芙蓉苑頻經蕙艸芳列營分虎旅對陛和龍章劍履還家
澁頭鬚下直蒼佩闕朝少主讀策感今皇舊抱弓如月重添戟是霜首先

迎玉輅身自掃明堂金匱山河誓丹霄日月光
大師姜呂望尚父郭汾陽爵已無前列班
惟有未行豈徒居紫闥兼以業青箱虞令稱
書監穰侯號智囊十經歸甲乙百氏屬低昂
僕本蓬蒿士蕭然薜荔裳上書三寸舌下
第九迴腸鸚鵡爲時忌蛟龍且自藏人嗔
杜甫傲公許禍衝狂惜別歌揚柳臨岐贈
鸚鵡星辰從此隔雲漢永相望魚腹何迢
遞鴻飛亦渺茫渡淮尋漂母入楚問韓王
裘重蘇秦辱金空陸賈裝不知麟閣上可
更憶滄浪渡江寄吳氏伯仲

烟中流水曉潺潺揚子津頭雨一灣沾袖成
斑皆客淚隔江如黛是家山欲探子母羞
錢篋末卜雌雄泣劍環寄語吳郎三玉樹
莫因裘敝笑人還十六夜孤山看月歌四首

白頭田父出當年寺下江深水拍天滄海
自從成陸後禪宮漸覺官連揚州西望隔
滄波花下樓臺月下歌好倩清光騎鶴去
買將紅袖鬪嫦娥江上浮嵐半有無輕烟
淡蕩月模糊彭郎隔水休相喚別是人間
一小姑千頃寒波看月生半江微暗半江
明山僧手種門前樹記得潮痕與樹平
席上贈故曹太史家歌姬

東山昔伴謝公游一曲能傾十二樓今夜佛燈禪榻畔路傍相逐按梁州
十三夜蓮香湖與周錫臣張鳴教對月有懷安茂卿

僊侶相攜醉玉缸暮山浮黛水淙淙何人不賞中秋閨幾度能逢八月雙
雲裏聞歌聲隔寺花間吹笛手臨窗芙蓉泣露紅芳早欲寄佳人奈涉江

溪上步月簡秦方伯胡侍御

如海侯門路不通溪流寂寂霧濛濛誰家客許花間入何處樽能月下空
敲散彩雲鐘隔水吹殘玉漏笛臨風南樓酒伴東山侶半憶庾公半謝公
十八夜得黃六秀才都下書以前中秋十三夜發

一紙千金手自裁片鴻遙托渡江來祗應不隔嫦娥面月裏封題月裏開

冷泉亭

以下竹筒篇諸帖皆萬曆初年作

暮濕浮花急春流飲鹿潭潺湲一片雨終日在山門

張伯雨墓

一杯蟬蛻瘞寒雲天上神仙地上墳香骨化爲遼海鶴華陽洞口侍茅君

重錢塘

十年旅客再浮江點點丹楓映酒缸佩劍尚餘虹一半寄書安得鯉成雙

宋朝圓夜雲爲殿越國浮屠樹作幢斜日西陵烟火亂暮山無數滿船窓

錢王祠

玉帶龍及類宛然朱門碧殿暮湖邊行人下馬看碑字高柳猿啼拂廟墻
未熟故都州十四波濤殘岸弩三千餘心一片匡山地月色潮聲更可憐
過車旣哀相國故宅

寒江無浪似魚鱗千舫迎潮泊水濱落木蕭蕭車旣晚亂鴉飛上舊平津
公孫弘平津關劉禹兎廡爲車旣

謁袁文榮公祠堂

雲中烟火映荒祠遺像蕭條入拜疑馬策扣門惟有淚雀羅張戶不勝悲
山光夜暗圍棋墅海色寒埋掛劍枝千載何人能下士斷腸空憶鄭當時
贈袁七秘書志乘起居相國夫人

手持封事上明光暫捧滂輿侍北堂黃閣夫人稱孟母紫微仙吏識田郎
葡萄好釀樽中綠萱州能消鏡裡霜路隔雲堦難入拜獨憐身賤愧張蒼
楊伯翼贈日本刀歌

楊郎手持一匣霜贈我拂拭生寒芒鉛刀紛紛空滿目君與此劍皆魚腸

南金換却東夷鐵上帶後奴軀血血來曾削刃未平蛟若蓮花淺秋月
燈前細看鴛鴦鋒入手還疑蛟與龍門外湖深恐飛去朱繩夜縛青芙蓉
杏花爛斑土花紫白虹沉沉臥寒水端家不惜十年磨他日還能報知己

玉女潭二首

以下別後疏

丹嶺金吾鑿寒潭玉女名面嵐成画閣架霧起雕楹開闢通花影疏泉納
洞辟此中堪避世何用符朝纒
覆宮歇綠水云是洗頭盆華表開山逕金鋪飾洞門鳥聲合翠布虎跡印
松根壇上祠官去先皇莫壁存

龍湫

石潭寒水翠如苔日暮寒蘿俯澗隈投綆漫言浮海出蕩舟剛及鴈陂回
泉飛暗作千山瀑龍去先從二月雷不飲何須愁笑客桃花洞口未曾開
天窟洞史金吾新開

碧落初開日丹崖始鑿年有山皆是洞無石不通泉扶壞成空谷雕林作
瀾天桃花栽尚短未滿一溪烟

阮將軍龍杖歌

以下皆萬曆間屢年之作

七尺天台藤千年石梁雪天矯欲飛騰支離半麟甲樵柯斷出空岩下風
雷畫鳴鬼嘯夜曳處常疑雲霧生植來猶恐猿猱掛將軍家居南巷中一
簷陰符四壁空何人贈此作扶老青鞋白帽隨春風策入花源去仙
人正傍桃花住騎鯨披衣濕連牀鷓鴣巢生散芝成樹康顏能挽弓三石充
國平羌負奇畫何爲將軍負杖行不佩寶刀持兩戟馮唐老去未逢時立
馬轅門弄柳絲濛雨滴發魚服箭窓風吹裂鞞弧旗雀羅當門印辭肘坐
歎紅顏成白首三百青錢杖上挑黃公壇頭醉春酒神物從來盡有靈延
津曾見躍青萍何必葛陂方化去只今已作老龍吟

袁生行贈袁孟逸

袁生袁生爾何玩世愛學嚴君平藏名在下肆朝取撲滿錢夕抱鴟夷醉
朱門招之謝弗往西寺東隣留且住已將白象卽心調更借青蓮爲法喻
有時落筆珠玑吐蒼兕驚啼老蛟舞狂來不減禰正平何物小兒揚德祖
自言身是大羅仙醉倒玉皇香案前手翻案上金爐火竈在人間六十年
後身還憶前身事長與麴蘖爲因緣我欲就生卜一卜在黃屋流烏飛入
耶陽煨萬戶千門鬼夜哭再卜鴨綠江東夾蒞州邦海內徵兵日虛耗未

見黃旛一片降三卜閩閩城狐鼠何縱橫讓王至德日以遠營營滿耳青
蠅聲生聞我言雙眼白吉凶不肯談周易長鯨一呼三斗空走上碧桃吹
玉笛吹下飛花滿地紅醉后高眠當茵席呼童乳枕夢游仙牀頭尚有支
機石

寄袁南寧

九疑何處是書托雁西征鬼俗從鷄卜夷風慣象耕青山行路盡白髮到
官生錫柱君應見功名在晚成

集周公環齋中

偶訪徵君宅梅花覆酒香杖將鳩作刻書與蝨俱藏北海賓盈座南朝寺
隔牆還同耆舊傳龐德在襄陽

送錢象先游楚

七夕仍佳節三湘乍遠游猿啼巫峽夜人到渚宮秋作客隨鷗鷺離家望
女牛所嗟王粲老不得共依劉

虎丘訪居士貞

芳日俄逢谷空山未見花因過處士宅苑是野僧家古井春無水衙門晚

帶霞金魚君莫歎卜歲正盈車

乙未人日對雪簡沈從先

春陰寂寂最堪憐人日登樓雪皎然不肯共消唯白髮且留相映有青鬃
桃花玉勒看山騎蘭葉銀箏載酒船笑殺洛陽袁處士閉門終日只高眠

七夕悼亡答錢象先

兩度穿鍼賦悼亡新詩讀罷重彷徨樓空祇歎蛛交網河斷難教鵲作梁
淚化去年衣上血愁添今夕獎中霜流黃月冷機紗寂空使詞人歎七襄

重游武林

十年不踏西泠路此度重游感舊時楊柳忽驚枝盡老芙蓉應笑客來遲
敲門月下僧猶在載酒亭中鶴未知明日南屏山麓寺壁間還覓舊題詩

錢象先移居

三年並舍接清言一日移家避俗喧
傲廡橋邊真隱士射潮江上舊王孫
垂簾柳不遮隣巷蓋瓦藤纏隔對門
此去墻東元咫尺相過莫厭倒芳樽

送曹能始進士北上

風流蘊藉更才華年少成名乍起家
銀甕青絲吳市酒竹爐紗帽建溪茶

車同轡令人人果筆似江郎夜夜花去覓江東二三于帝京明月醉琵琶
贈大行詔使封夾

口奉天言下玉京滄溟萬里是王程衣裳盡帶魚龍氣鼓吹皆合波浪聲
漢使樓船疑鬚吐夷王官殿駕齏成胡商海客如相問但說中朝稅法輕
雪後留徐茂吳宿齋中

空齋佛火夜悠悠殘雪松間曉尚留樽綠敢言開北海榻陳聊得下南州
關芳當戶寧爲艾鷹鷂逢春未化鳩明日與君同跨馬要離墓下問吳鈎
贈長洲蔡明府

廿年京洛羨飛騰此地重逢不負丞走馬泥塗朝帶雪棲鴉官舍晚如水
橋邊鳥鵲非銀漢塢內桃花隔武陵一枕黃梁俱莫問君依遷客我依僧
雪中梅花

二月春光雪尚飄看梅獨坐思無聊銀花亂綴難分萼玉樹交加莫辨條
粉似傅來容易褪香偏留却不同消一般飛入社臺裏獨讓殘英點額嬌
寄萬伯修經略朝鮮

中丞秉鉞賦車行鳥綠秋初飲馬行十致半鍾遼海粟百無一練越營兵

邦傳箕子期恢復亂比公孫待削平若說屯田能却敵向來方略在金城

不渡錢塘簡屠長卿

東望錢塘去路賒鄞山鄞水隔天涯非關雪夜空題棹其奈炎蒸苦憶家
短髻烏鬢簪茉莉輕衫白氎繡桃花採蓮亦有江南女何用扁舟渡若耶

庚子除夕

紛紛祀竈與禳田共送殘年祝有年零雨一冬無半寸濁流五斗直三錢
黃金盡地難充貢白骨如山尚戍邊怪殺虛堂兒女輩遊人守歲憫人眠

辛丑元旦

凍柳寒梅早未舒大風無乃發吾廬春杪安得青絲菜歲酒唯供赤尾魚
槐里直臣空折檻平津丞相未懸車謂趙聖人欲賜臨軒策誰上當年賈

誼書

除夕哀令君齋中

衙齋寂寂五辛盤老樹空庭雪片寒歲月速如將去客風烟淡比乍驛官
投林羽幸離樊苦縱壑今樂網寬紅燭也隨人惜別當遙流淚不曾乾

送黎惟敬還嶺南時有夷警

乘風五雨未從容，惜別休言路幾重。
青艸萋如炎海瘴，水雲奇似博羅峰。
司農豈惜江南早，疇客唯愁嶺外烽。
牀上荆綬君莫問，沉埋不是舊芙蓉。

寄大司空應城李公

澤蘭汀芷負幽期，七首難酬國士知。
山簡醉來能上馬，謝安歸去但圍棋。
楚天雲雨皆成夢，湘水峰巒半可疑。
誰共習家池上燕，綰鞵一曲酒淋漓。

重過朱右明家

東風淡蕩水禽飛，花月春江幾度遊。
望處只疑爲隔岸，到時誰識是中流。
燃燈照海非牛渚，列炬薰天學蠶樓。
車轉不投賓亦住，綠樽紅袖醉筵後。

送蔣都護入蜀

瞿塘峽口水初生，都護樓船入蜀行。
地到益州皆沃野，管閒賈叟盡雄兵。
千雲鳥道三千里，掛樹猿啼一兩聲。
欲卜封侯何日事，成都市上問君平。

送陳道源參軍借計甥野臣北上

下車驅馳又入燕，一杯昌歎當離筵。
金輪少府踰千鎰，官守參軍及九年。
渡海旌旗留樂浪，薰天宮殿失甘泉。
入朝不藉王生對，似舅名甥爾最賢。

贈劉汝臨

劉郎才思長，柳看帝里風。光駐馬鞍村，過杏花春酒綠。磯登燕子幕，江寒
湖平桃葉同。衣帶雨熟枇杷似，彈丸歸去稽山當。仲夏園林竹箭長，千竿

答孫文融中丞時自遼陽歸

客星尚未入文昌，先寄雙魚到艸堂。試問夷邦江鴨綠，何如鄉社酒鴉黃。
要盟未固同城下，作舍難成是道傍。誰識邊臣心最苦，青銅鏡裏髮如霜。

題梅客生中丞平朔方卷

靈武名高御史馳，更勞開府伴雲中。美人學舞魚腸劍，斷髮能彎象弭弓。
城下已無胡飲馬，帳前少用客和戎。不知今日麒麟閣，誰是西征第一功。

寄問歐楨伯後人

五柳先生舊業荒，菊松雖在壑無光。夜臺安得傳雙鯉，春水聊馮問五羊。
未識何人銘有道，已知生子勝中郎。欲將匣裏魚腸劍，解去狐墻掛白楊。

吳參軍雨中過池上君方以五市之雲中

小池風雨故人逢，釀得春寒酒盞空。忽漫一官辭閣下，暫隨諸將入雲中。
斜陽芻秣驅胡馬，終歲金繒出漢宮。女樂何時頒魏絳，太平天子正和戎。

送華晉民入南雍

才子擔簦指舊京，垂楊繫馬聽新鶯。隔江山入長干寺，帶雨湖添建業城。
絳帳傳經秦博士，布衣游俠魯諸生。春江花月清淮夜，知醉誰家雁柱箏。

張堦婦自都門喜賦

靡蕪何必怨王孫，千里驅馳慰倚門。馬角未生身却返，魚腸無恙舌猶存。
平津客散當年問，泌水池荒貴主園。坦腹細談京俗事，松風消盡酒盈樽。

答王大吉自武林北上

新詩字字比瓊瑤，池上相過破寂寥。微雨不消吳市暑，疎松如帶浙江潮。
吹笙尚憶前身事，結襪空思哲匠遊。京洛故人如問訊，梁鴻猶住伯通橋。

中秋日送錢象先游豫章

西風征雁不堪聞，病裏題詩忍送君。月與離樽今夜滿，秋將行色一時分。
匡廬木落山如黛，彭蠡霜寒水似雲。公子西園賓客盛，好陪飛蓋共論文。

宣城友人移居白下

南朝山色近，移家朱雀橋。通路狹斜窈，水月從江樹出。敬亭雲被苑，墻遮
橫舟渡口尋。桃葉沽酒村邊問，杏花聞道章臺街。畔柳不堪繫馬只藏鴉。

答余宗漢

宗漢與余同年皆七十

題詩千里問秦蓬青雀西來信忽通郵
寄陽春元和寡絳人甲子偶相同
麒麟莫道生偏晚鸚鵡爭誇老更工
曾赴瑤池春燕否蟠桃可及荔枝紅

答寧夏黃中丞唯尚

靈武妖氛掃未清十年狐鼠尚縱橫
中丞杖鉞新開府驕虜新第莫近城
帳下幾人能艸檄秋來無處不屯兵
君王欲識邊臣苦一夜清霜繞鬢生

寄張心湛天師

青鳥音書久寂寥霓旌去入鳳城遙
身披一品麟衣坐手捧三公象簡朝
長樂花深容曳履未央月出許吹簫
不須更上蓬萊頌清靜無爲祝帝堯

寄李本寧於廊廡

關榆未綠柳纔舒使者行邊雪片踈
回紇十年頻貢馬龜茲一部動隨車
送秦人惜才空老詛楚時聞禍漸除
寂寂寥寥人似舊不須重問子雲居

戊申元日

枕上俄聞春鳥鳴新年強起懶逢迎
樽前故舊凋零盡鏡裏形骸老病成
仰面絕纓齊贅婿倮身過鼓漢狂生
如今無復當時態佛榻禪燈遠俗情

送徐惟和還關兼寄惟起

未把井州作故鄉送君重與賦河梁吳宮蟋蟀方帝月越國芙蓉未着霜
貧從翠樽忘逆旅弟兄漁獵憶隣莊還家且說西堂夢細擘黃柑荐酒嘗

林純卿卜居西湖

藏書湖上屋三間松映軒窓竹映關引鶴過橋看雪去送僧歸寺帶雲還
輕紅荔子家千里疎影梅花水一灣和靖高風今已遠後人猶得住孤山

七十初度漫賦二十六韻

憶上蓬萊殿曾雉石室書史臣陪出入丞相借吹噓故國歸來早長安不
可居爲園樓曲巷種柳拂清渠西縣琴聲近南隣樹影疎庭馴得食鳥池
躍放生魚抱膝吟梁父無心賦子虛鄙人荆五投醒士楚三問白鳥相忘
父膏蠅肯舍諸淡衷同撲滿傲骨類籬除漢紀偷桃舊曲風剝棗初秋山
當几席春酒滿因盧大斗夢爲壽新詩賴起予自慚同襪線何以報瑤琬
浚邑千旄騎燧煌鐘鼓車高僧遺巾拂名妓進衣初丹指楓將變黃知菊
漸舒何當嚶敝帚不可賴耕鋤花落從堆積雲來不掃除每開池上酌頻
摘雨中蔬王猛貧捫蝨公孫老牧豬陌霜嗟獄氣蔽日憤刑餘殿上誰扳
檻屏前罷引裾終朝游汗漫豈但薺華胥中聖曾無計求仙焉所知桃花

流水渡願作武陵漁

茉莉曲六首

潁州船子兩頭尖茉莉初來價便添公子豪華錢不惜買花只換樹齊簷
花船盡泊虎丘山夜宿娼樓醉不還時想餓錢輪小妓朝來隔水喚烏蠻
滿籠如雪叫欄街喚起青樓十二釵繡儼裝錢下樓買隔簾斜露鳳頭鞋
烏銀白鐵紫磨金斷出纖纖茉莉簪斜插女阿瑯瑯警曉粧朝月拜深深
賣花儂父笑吳兒一本千錢亦太疑儂在廣州城裡住家家茉莉盡編籬
章江茉莉賣江蘭夾竹桃花不耐寒三種盡非吳地產一年一度買來看

王德操被盜唁以二絕

月黑村空夜半時操戈暴客苦相追也知不但因怯篋欲乞蕭蕭暴雨詩
意外梅花惱客眠偷兒橫索賃春錢王家舊物休將去留取青青一片氈

重經玉河

舊游會見築城時城下家家種柳枝試看柳枯心半蠶爭教人老髮無絲

立冬

秋風吹盡舊庭柯黃葉丹楓客裏過一點禪燈半輪月今宵寒較昨宵多

送項仲融游金陵三首

長板橋頭聽山聲徐娘雖老尚多情門前車馬無人問自按梁州促柱箏
石頭城下看春潮天塹長江萬里遙漁人網得沉江劍猶似當年鐵未消
鍾山弓劍似橋山一去龍髯不可攀高帝在時親放鹿金輝歷歷在中間

西夏凱歌四首

聖人親御鳳凰樓太白旗懸叛將頭十道使臣持露布春風一日滿神州
胡沙如雪月如冰白骨稜稜幾十層血污鬪樓將化碧不知誰作党中丞
捷書朝報夏酋平十萬狂倭夕胆驚聞說九重方赫怒東邊其氣受降城
詔賜田租墨未乾誅夷頑失主恩寬一朝罷却軍興費四海蒼生動地歡

黃浦夜泊

黃浦灘頭水拍天寒城如霧柳如烟月沉未沉魚鱗細初來欲來人放船

題唐伯虎烹茶圖爲喻正之太守三首

太守風流嗜酪奴行春常帶煮茶圖園中傲吏依稀似紗帽籠頭對竹爐
靈源洞口採旗槍五馬來乘穀雨管從此端明茶譜上又添新品綠雲香
伏龍十里盡香風正近吾家別墅東他日干旄能見訪休將水厄笑王蒙

雜言

凍雲寒樹晚模糊水上樓臺似画图紅袖誰家乘小艇捲簾看雪過舊湖

曹山人子念

子念字以新太倉人元美之甥所謂近體歌行酷似其舅者也為人倜儻
直然諾有河朔俠士之風元美歿移居吳門蕭然窮巷門無雜賓與王伯
穀先後卒

除夕表中郎縣齋守歲

江左平曠白浪遙賃春空寓伯通橋蓮門歲計差藜糝花縣春情惜柳條
梳髮鏡中霜易鬢寄愁天上雪難消流光不爲浮生住挑盡寒燈夜併迢

少年行二首

六郡良家三輔豪千金鞍馬百金刀也知侯印尋常事不分秋來太白高
長安兄弟舊知名半是期門半射擊醉就胡姬爐畔宿明朝齊赴受降城

哭舅氏元美先生二首

好客千金舊家捐晚來翻結賣文緣不知湖海襲衣士更向何人索酒錢
浮陽千里恨春潮一去麻姑信息遙華表縱教啼白鶴也應城市半蕭條

居布衣節

師字士貞吳人少從文待詔游學其書畫待詔之門人未能或先也家故隸織局繼監孫隆聞其名召見不肯往孫怒坐以通柙拘係破家傲居半塘數椽蕭然所與交多山人袖子落落寡諧每過辰未舉火吟嘯自若也年六十以窮死詩名牧豕集王德操少從士貞學詩得其手藁吳門史生亦有繕寫殘帙余合而錄之士貞画法簡遠有宋人之風画家多稱之而未冇知其能詩者往與孟陽錄其題画一詩甚佳今不可復得矣

夢游仙四首 戊寅二月廿二夜

水精小殿玉勾闌鯨甲風生隨處看四面廉垂常不夜六銖衣著豈知寒
翠衿易語如鸚鵡紅樹花開似牡丹報道雙成娘子到麻姑有信問平安
一絨雲札早相邀去聽麻家弄玉簫毫倚鳳皇花不謝車將翡翠路非遙
夜珠似水鮫人淚春服如水織女納蓮酒千杯未成醉赤闌橋外上秋潮
一葉悠悠太華近來弱水亦勝船春寒不上三珠樹海氣嘗生五色烟
金鳳殘歲邀翰墨赤龍小輦載神仙自從雙倩偷桃後花已重開今幾年
朱樓翠閣碧桃花花底春雲擁路斜藍水有田皆種玉赤城無樹不飛霞

瓊環猶自憐交甫條脫何緣贈綠華
惆悵銀郎易歸去重來何處覓胡麻
雨後過雲公問茶事

雨洗千山出氣氤綠滿空開門飛燕子
吹面落花風野色行人外經聲流
水中因來問茶事不覺過雲東

半塘寺上一上人小樓

何處聞清磬春雲度半塘茶香連小院
樓影帶修廊不染蓮花淨閒貪佛
日長晚山如有意飛翠滿繩牀

送汪公幹重游塞上

才子亦弓裘重為萬里游頗諳區脫語
未飲月支頭雪上黃雲色沙中莽
角愁功名少年事塞艸易為秋

秋日

樓花委露渚蓮愁無復紅妝蕩小舟
澗淡雲山堪入画蕭閒門迥自宜秋
當時戲酒人如鶴昨夜吹簫月滿樓
鴻雁欲來江欲冷白蘋風起思悠悠
子建自楚歸過訪

湘君廟下鷓鴣啼芳艸王孫去路迷
春水看消巴蜀雪桃花游過武陵溪

朝雲夢裏江南路風雨燈前夜半鷄啼到故園秋未老一尊還唱白銅鞮
洵美頗行攜歌姬過山中言別阻雨不赴因簡以詩

公子臨行出翠鬟新歌能解唱陽關不嫌杜牧三觥後生怕周郎一顧間
梳扇芙蓉隔秋水枕屏雲雨自青山燭花影裏銀箏畔誰見鷺鴻向月還
聽雨遺懷二首

翠粉几杖靜柴門抱鏡忘機老灌園不遇曾聞七十說出關空著五千言
高雲暮色霜前雁獨樹孤烟原上邨零落楚蘭愁未采一江風雨泣秋魂
一番秋事老芙蓉蕭蕭颯寒生暮雨餘村巷犬聲如吠豹隣家燈影有歸漁
重陽酒熟萸初紫五柳霜清葉未疎賣賦虛名吾豈有向來多病似相如
無題簡洵美

綠鬢歌墮翠蛾愁蠟燭高燒花滿樓蕭起玉臺雙引鳳星起銀漢一牽牛
茱萸匣裡常藏月苙蕊枝頭不作秋昨日江楓吹葉紫橫塘無復采蓮舟

暮歸書事

竹溪蘿徑自幽清片片山衣細靄生薄暮圍盧牛烟火高原禾黍正秋晴
遙看綠酒懸帘賣未辦青錢拄杖行新月柴門牛背笛澹雲紅樹總詩情

兩夜聞雁

鈺斜寒照竹山靜兩聞牀雁到秋如許人愁夜未央江天將隻影霜信過重陽小夢知何處三湘烟水長

簡克承文

臨頓東頭水竹居路人盡識隱君廬墨香小研磨銅雀共艸殘編辟蠹魚
自首尚玄猶自苦黃花對酒近何如青山儘有蕭閒事欲寄芭蕉不可書
無題四首戲呈孝甫子建

高樓月色白于霜画枕屏寒夜未央織女機絲隔河漢娥皇竹淚滿瀟湘
雙飛自託雲中鶴一曲空彈陌上桑妬女津頭潮不到江流却似九迴腸
玉槭消息滯天涯零落銀箏雁柱斜羅機無塵生誰水春雲有夢到草華
曉星明處疑爲月霜葉紅時認作花人說莫愁君不信石城何路問伊家
寒鴻聲斷艸艸正啼銀燭熏籠坐不辭蛺蝶畫羅捐扇日驚發裁綺授衣時
秦家山上烏桕早韓椽墻邊月到遲黛綠暗銷人去遠章臺無柳鬪雙眉
蘭燈光裏織流黃斷續柔絲斷續腸不恨紫槽常抱月最憐綠綺解求風
屏風自隔春雲熱游水新添夜漏長宋玉多才作賦至今人說夢高唐

對酒

三杯莫惜瘦顏酡百歲其如半去何鍊盡少年風月在剩留餘事病愁多
滄江倦客新黃髮空谷佳人舊翠蛾竺國蓬山那可問醉鄉深處且婆娑
隣農以麥飯菜羹見餉

歲莫山邨二首

清霜紅日滿高林
火蕭疎灌莽深
欲和楚吟無白雪
能生壯色少黃金
鶻鴞俊鶻呼風過
不雨寒雲起夕陰
何事悲歡却成疾
如灰已泯少年心
落木寒雲知幾重
枇杷花下鹿麋蹤
家貧伏臘猶無計
山靜朝昏惟有鍾
雨雪短衣凋薜荔
風塵長劍暗芙蓉
悠然抱膝歌梁甫
伊呂之間是臥龍

對雪

老樹荒村鳥雀稀
隔溪茅屋午烟微
黃雲壓地門深閉
積雪滿山樵未歸
一樹梅花開覓句
十年湖海歎無衣
釣魚却憶披蓑客
小艇寒江興不違

舟行書事

滄江無數白鷗群
欹枕漁歌杳杳聞
斷港浮消雪水薄
陰微欽護霜雲

鷓鴣漸覺人家近，木落遙看浦溆分。
茶竈筆牀舟一葉，布帆影裏見斜曛。
舟中夢後月明江，清恨然有懷。

月吐青山夜四更，夢迴酒醒正寒生。
滿空霜色白於雪，繞枕江流細有聲。
蠶繭紙新教寫字，龍香火煖聽吹笙。
少年場上春游騎，對水桃花舊日情。
宿道院

解索神仙宅，青蘿小洞房。
何人識紫氣，無夢熟黃梁。
麻拂如雲石，簾飛似水霜。
不知寒漏水，消盡讀經香。

初春書事

戊寅

青蘿小屋綠莎牆，臘后梅花已試香。
一斗東隣買桑落，千金北客問干將。
讀書研破魚生釜，臥雪齋虛月到牀。
欲識溪頭春幾許，新波新柳似鵝黃。
楓橋夜泊

漁火宿江村，何人識此情。
變名張儉老，去國蔡維輕。
獨樹橋頭雨，寒鐘夜半聲。
春洲有歸雁，無那暗魂驚。

泊次與吳文學

對酒無言興盡還，落花棚下有青山。
明朝欲釣鱸魚去，君若來時恐未閒。

病中口占

年年抱病足中秋明月無緣酒有仇幾兩阮宜新屐履一蓬魯望舊搵舟
飛鴻閣外山如畫斫鱸亭前水自流料得此時相憶者冷猿獨鶴與馴鷗

秋來未登寺閣病中想見其景物幽勝詩簡一開士

閣鎖空寥秋未攀風烟死在画圖間澹霞斜日半江色濕翠空雲初霽山
落雁沙頭孤笛起采菱渡口一舟還欲扶殘病來看月莫遣知寮早上關

壬午元旦

鐘鼓高城送臘徂雲霞暗色上桃符日隨歲月開三始春與鶯花到五湖
借宅南山非捷徑對人故態足狂奴依然舊識東風面柳眼青青向酒壚

雨中簡上德操

有美易三秀神情則復跋能爲絲靈賦善榻會稽書江雨鉤簾暮梨花對
酒初詩成猶未寫待子問何如

過陸華甫西溪艸堂

鳥目山頭客銅官住十年蕤蘭素滿院種秫雨連田暈開溪西艸茶飄竹

外烟陰陰門柳色不隔渡頭船

桃山人攜酒同遊歷雨看梅花

十晦芳園傍水涯藥闌莎徑池山斜綠蕩小雙鶻春酒烏角高巾對玉花
漠漠暗香留月色蕭蕭白髮醉年華如何甫里天隨宅却是西湖處士家

穀日感懷

穀日條風喜及晴東昂南隴已春生少從劍客游三輔老傍田家卜五行
衣食有端終歲計江山信美故園清蹉跎十畝桑陰地慚媿花林鳥勸耕

無題二首

坐倚熏籠火尚溫鐘鳴高閣又黃昏梅花雪後門半掩萱惹枝頭月一痕
漫說傾城豈顏色曾聞化石是精魂寄君茶碾湘江竹猶有娥皇淚點存

力薄懶梳十八髮夢回誰與說雙鸞鵝兒酒嫩堪成醉雲母屏涼不障寒
芳艸都從行處長春山豈是同時殘金魚牋紙遞文句昨夜燈前仔細看

春寒

重樓燕子隔天涯五柳陰疎未聚鴉十日春寒淹雨雪幾番風信到梨花
橫塘水長聽鶯處小巷泥深賣酒家多少朱門咽絃管沉香火底按琵琶

夢後作

酒醒天涯春幾分
綠琴惆悵昔年聞
海棠無信作寒食
夢雨何心入斷雲
石竹短籬留半臂
秋香小字記雙文
潯陽江上湖難到
此夜花前忽見君

春晴書見

金羈芳艸去翩翩
王謝兒郎美少年
雨水已過正月後
鶯花不隔短筇前
春雲擬黛山千疊
西閣籠烟柳半天
燕子未來寒食遠
誰家庭院試鞦韆

有懷湖上簡張文學

冷落湖頭白鳥期
青蓮艇子去遲遲
柳應拂水今幾尺
杏已開花可滿枝
病起故人誰載酒
春來何處最宜詩
欲知雨後千山色
總似張郎新画眉

春日有懷

柴門春水浴沙鳧
綉榻垂揚短日初
蒲花嫩淺寒迎燕
雨將新綠入蘼蕪
焚魚學士誰招隱
放鶴仙人不可呼
欲聽黃鸝過橋去
隔烟小鳥喚提壺

春書

泥香江暖燕來時
紅白花添桃李枝
艸色一簾門半掩
臥看雙蝶起游絲

春寒

春欲分時寒更深
關風伏雨晝陰陰
不通燕子重簾閉
憔悴花枝病酒心

新晴寺閑

苦澆愁霖思不禁，偶梯香閣出叢林。
酒旌卷陌桃花遍，燕子人家春水深。
獨鳥自飛吳苑樹，千山不盡楚江陰。
清明已近芳菲日，鼓角偏傷遲暮心。

晚晴簡姚伯容

曲薄斜扉帶遠林，鶉鳩啼徹晝陰陰。
陰雨催春色二分，過水長堤花十尺深。
江上片帆斜日影，天涯芳艸踏青心。
料君閉戶焚香處，道性知來爲聽琴。

唐姚合詩聽琴知道性

寄蔡侍御

寥落芳時臥病慵，閉門艸色喚愁。
劍氣却從何處吐，鷄聲偏向夢中。
一鶯花春老，青山雨鼓角風高，鐵甕城。
馬西臺御史能無意思，想見臨觴醉不成。

春暮睡起

避俗年來聊避諠，移家猶未問桃源。
雨晴門巷皆山色，花落春衣半酒痕。
身在江湖誰是客，心空夢幻已忘言。
游絲柳絮偏無賴，遍逐東風去繞村。

王雅適父居金陵過訪山中因贈

春徧天涯芳艸多，王孫裘馬意如何。
巒嶂山好初收雨，羅綺江平暮不波。

韋曲花前千日醉，杜鵑聲裡片帆過。秋清擬泛秦淮月，與爾同聽玉樹歌。

雨中

習性未能忘，攤書日滿牀。四隣分樹色，一徑借溪光。聽雨支高枕，下簾留晚香。蕭閒生意在，庭艸過人長。

仲夏閒居

樹底柴門不浪開，松釵竹粉半青苔。綠分田水新栽稻，黃入園林已熟梅。小艇送僧籠鶴去，片雲載雨過湖來。夕陽山好詩難就，夜合花前費討栽。

新秋雨後夜坐

山螢一點拂衣流，茉莉花開香暗浮。河漢影斜初過雨，井桐涼墮已迎秋。玉笙小院常年月，絃扇長門昨夜愁。惆悵瑤芳易凋謝，美人何處獨登樓。

秋日書懷寄吳惟範

十年握手愧君知，頽洞風塵鬢已絲。元叔倚門終骯髒，長卿慢世自栖遲。過河獨抱枯魚泣，斫地空歌老驥詩。亂首雲飛秋色起，江湖又是雁來時。

秋日早起

蛩聲半掩草門空，短髮朝來不受風。日出山光落衣桁，雨餘秋色在梧桐。

嗟此游孤筇外存再年華一鏡中萬事浮雲多變滅莫將衰淚泣途窮

中南過齋中烹茗清談試筆寫圖因題其上三首

落盡藤花砌水香松風如水畫初長幽人自是山中相鶴髮黃冠坐夕陽
蓮社踈鍾報曉晴青山落日映江明一番紅紫春歸後新綠如雲遮暹生
滿城車馬看春忙君猶滿髮顧艸堂我亦興來扶病坐鼠須問叱墨花香

吳門春游曲四首

濠上花深翡翠樓前白月滂江流香風兩岸笙歌合夜夜燈燈照客舟
禁烟將近煖風微桃李陰陰燕子飛好向西虹游墅去薄羅小扇夾紗衣
春江花月滿春烟夜夜琵琶宿舸船城上烏啼霜又落紫柳槽煖不成眠
誰家年少恣春游翠幄朱旗三櫓舟齊唱棹歌江似沸黃鸝啼殺不迴頭

歲暮

淒淒風色緊鷄犬靜柴門田野無它事溪山有此村暮寒深白屋隣語近
黃昏且復篝燈坐空憐鬢髮存

雪中再送玄掇

金昌西望卽天涯寒滿扁舟去路賒瓜步沙頭莫迴首一江風雪似楊花

重題自画小景贈戴子文去画時四十年矣

點染青山四十年寸縑不改舊風烟散人漫竊江湖號未買松江一釣船

張舉人鳳翼

鳳翼字伯起長洲人與其弟獻翼幼于燕翼叔貽並有才名吳人語曰前有四皇後有三張伯起叔貽皆舉鄉薦幼于困國學叔貽蚤死而伯起老于公車年八十餘乃終伯起善書晚年不事干請鬻書以自給好度曲爲新聲所著紅拂記梨園子弟皆歌之伯起與余從祖春池府君同舉嘉靖甲子余弱冠與二少年衝酒闖入其家燕酒闌燭短伯起具賓主身行酒炙執手問訊其言藹如先進風流至今猶可思也

西苑志感

芙蓉別殿未央西爐氣晨暉雉尾齊出洛神龜將寶籙銜花馴鹿遶金闈
近臣拾翠供玄艸使者乘鸞訪碧鷄一自六龍天上去幾回清禁改璇題

梨花

重門寂寂鎖香雲雨滴空階坐夜分老去微之風調在折來何處與雙文

題柳

千絲千樹拂天津三起三眠出上林何似小桃低曲處一枝斜覆玉窗深

北苑懷時

帝里春深淑氣遲天街無路踏香泥逢人客坐三分話到處官衙一局棋
叔夜不堪徒自遣馬卿多病欲何之歸時若遇高陽侶有酒如泥醉肯辭

劉僉事風

鳳字子威長洲人嘉靖庚戌進士起家推官拜監察御史左遷興化府推
官升河南按察司僉事罷歸以老壽卒于家子威博覽群籍苦心鉤索著
騷賦古文數十萬言觀者驚其頗富憚其與僻相與駭掉慄眩望洋而歎
以爲古之振奇人也嘗試爲之解駁疏通一再尋繹肌理解已而索然
不見其所有矣余嘗得子威所誦讀遺書觀其丹鉛考索大槩於篇中擷
句於句中擷字而所擷之字自一字至數字而止如唐人所謂碎金齋最
者耳其有所撰述也累僻字而成句字稍夷更刺僻字以葢之累與句而
成篇句稍順更換與句以竄之而字之有訓故句之有點讀篇之有段落
固茫如也鈕釘堆積晦昧詰屈求如近代之江宜爰李滄溟且不可得而
見于古人乎韓子曰降而不能乃剽賊子威其剽賊之最下者與子威前

後集計數百卷厥後有華亭馮時可者字元成萬曆間進士官至副使其學問尤爲早靡跡駁補綴刻集流傳吳中名士循聲贊誦奉之壇坫之上碑版誌傳騰涌海內二十餘年少年詆訶弁州大函獻媚江陵之語晚而以文備乞稍知文義者無不嘖嘖雲間選明詩者以元成配子威夾考其生平則又子威之重儔也近代詩文別集汗牛充棟具有名彰微而不見采錄者元成其眉目也故表而出之

十五夜月

明月照滄海清輝盈此時似規流素魄持粉儷新姿波瀉淪河影榆塞露鵲枝與君同萬里無那獨令思

昭臺怨二首

妾意慟芳樹君恩踈桂宮薄翅清瑟斷燕去回梁空慢臉羞鉛翠嘖蛾滅黛紅瓊闌花半落盡日閉春風玉輿行幸絕朱陛暗青苔不分恩成故猶持寵自猜薄寒生碧霧流葉下丹臺睡井終捐棄清塵豈重回

芙蓉樓送客

醉酒高樓此別君
袖中賞艸惜斜曛
月明水上如相憶
寄取瀟湘數片雲
和夜上受降城聞笛

北下低垂掛戍樓
黃河不逐月西流
一聲長笛衝沙起
散作邊人萬里愁
魏同知學禮

學禮字季明長州人爲諸生才名藉甚劉子威以博學自負一見心折敦
禮爲子弟師與共唱酬合刻其詩曰比玉集以歲貢除潤州訓導擢國子
學正詔刻十三經注疏委以較讐升廣平府同知罷歸寓荆溪年七十
八李季朗詩名因于威而起南皮李時遠評比玉集云季朗詞鋒甚銳當
勝子威一籌識者以爲知言

春思曲

別意落悽枝閒懷寫愁葉絨怨投素鱗銜情卷故篋
誤嫁游俠郎棄置薄命妾香縷羅衣襞不開玉搔寶釵
寒自疊衾將空半冷鴛鴦夢逐飄飄拆胡蝶川長不
得渡春花驚已暮爲歎朱顏不待秋獨持皓齒終成
妬舞腰倚柱裏啼粧歌頰低燈望歸路魂飛在他鄉
掩袂泣河梁笛邊閒折柳琴裏咽求凰粉心隨鏡紅
已散芳願消花弱自傷明月兩懸思黃沙孤斷腸

飲馬長城窟，結客少年場。毋命湘靈鼓，瑤瑟復聞秦。五
卷衣裳故，情搖落。空流水哀鴻，單宿湘浦裏。始從木末
送芙蓉，又見淡亭。候桃李桃李映人，清芙蓉摘未成。
青松委蘿壑，白露掩蕪城。蕪城一去三千里，蘿壑秋
寒殊未已。盤龍寶鏡，網蜘蛛。孔雀金屏，隔羅綺。金屏
寶鏡不可期，孔雀盤龍有所思。迢遞關河吹暮雪，蕭條
庭戶起涼颼。漢王臺前花似繡，隋家堤畔柳如絲。已
遣輕車迎日遠，更驅羸騎斬層蒼。李廣軍中無部伍，
昭君馬上作關氏。年年邊徼休乘障，處處鏡歌聽凱辭。
但使金微長息戰，與君朝夕共輔屨。

昭臺怨二首

翠袖辭金殿，青苔閉紫宮。香寒羅帳曉，春歇玉階空。
艷態消花上，悲情落管中。君王恩未薄，妾夢向來同。

別館芙蓉暗，閒房翡翠寒。漏催千夜盡，宮鎖一春殘。
芳歲驚流水，容華泣楚蘭。誰憐愁坐意，新月在樓端。

和章憲副貳詩

翠館雲樓花欲晴，新粧初就晚鸞驚。莫愁艇子知何處，
露濕衣香到月明。

采蓮曲

烟中一葉采蓮舟兩岸香風正早秋瞥見江南明月上玉簫吹斷紫雲愁

章副使美中

美中字道華常熟人其父徙吳家石湖之傍九歲能屬文嘉靖丁未進士除大理評事擢江西按察司僉事五載遷廣西參議副使四川填松潘投劾歸里將召用而卒身後衣不盈篋錢不滿鐲惟圖書數卷里人稱之士雅字循之萬曆己丑進士知嘉善縣有惠政歷官工部郎中父子皆能詩道華與皇甫子循王元美善而循之授毛詩于魏季昶王伯穀叙其詩以爲季昶工六朝道華工初唐而循之兼得之父子之集皆張幼于所撰定也

早發湘潭

凌晨陟平麓野色春行旅媚娟子林花猶含夜來雨山深雲不流春去禽自語景物各有適吾道豈踟蹰

暮相思

征帆日已遠回波不相待嗔色孤峰來故鄉何處在日淡墟裏烟雲盡天

邊海如何暮相思坐令髮容改

毗陵道中遇司勳皇甫子循舟有詩相貽奉答

三月輕風桃李陰春城吹入客愁深扁舟未逐五湖去華髮空隨雙鬢侵
芳艸東歸故園色江流北轉逐臣心烟波日暮知何處天畔踈峰相對吟

章士雅

紀懷二首

鳥聲啼散一簾花遙憶春風怨歲華何事半生能薄倖綠楊深處卽爲家
江城二月客衣單況是春風十日寒鄉國梅花吹欲盡不須橫笛倚朱欄

春晚二首

春望亦堪憐平蕪遠接天不禁雙燕子飛出落花前
春雨過前溪垂楊樹樹低綠窗人不語惟有曉鶯啼

柳枝詞

長淮渡頭楊柳春長淮市上酒旗新繫船沽酒折楊柳還是去年西渡人

秋雨

秋雨秋風入暮天愁心獨與片帆懸總教作客非千里堪笑爲郎已六年

蘆葉半黃風破岸稻花全白水平田樓遲歲月憐今昔梁父孤吟倍黯然

憶小園花事

天南人去二三月小苑花飛五六枝孤閣自開巢乳燕疎簾不卷駐游絲
園蔬未作愁中供芳艸還應夢裏詩最憶東隣夜吹笛一聲遙在月明時

別思

東方千騎去如雲最有羅敷念使君曉鏡疎花看寂寞夜香明月坐氤氳
門前細雨新桃浪陌上和風舊燕群莫道朝來無錦字落紅飛處半廻文

顧副使大典

大典字道行吳江人隆慶戊辰進士授會稽敘諭遷處州推官當內遷乞
爲南稽勳郎中僉事山東以副使提學福建坐吏議罷歸家有諧賞園清
音閣亭池佳勝妙解音律自按紅牙度曲今松陵多畜聲伎其遺風也

聞思

朝日斜照戶垂楊低拂牀新篁未解箨幽蘭已謝芳
窺梁玉筋流殘粉金爐冷夕香羅衾空有夢無信往遼陽

渡黃河

疲馬日投北閭意若何星霜催短髮風雨渡長河遠道逢人少歸心入
夢多未能逃世網微尚竟蹉跎

舟夜憶郡齋雜閣

舟移澤國暮烟長望入滄波思渺茫遙憶郡齋清絕處萬山孤閣夜焚香

九月十七夜與周國雍話舊

霜滿蒹葭月滿池斷烟疎樹影參差天涯莫道相逢易昨歲今宵是別離

梅下吹笛

紅筵綠酒撲寒香樹樹梅花壓粉牆忽見玉鱗飛夜月自吹長笛坐胡牀

沈少卿席上有贈

曾向毗陵怨別離十年重見不勝悲相看共有江州淚濕盡青衫是此時

開居雜興

坐來黃葉滿漁磯小閣疎燈對掩扉竹覆古牆經雨暗夜分時復見螢飛

重登虎丘

劍壑秋風起暮烟寒泉落水自依然翻因解組重來日悔別青山二十年

周秀才天球

天球字公瑕長洲人爲諸生篤志古學善大小篆隸行艸從文待詔游待
詔賞異之待詔歿豐碑大碣皆出公瑕手陸慶中游長安燕集唱酬之作
一時詞客皆爲讓坐而詩名頗爲書法所掩胡應麟詩數盈稱其觀象臺
諸作以爲絕倫大率聲調雄壯覲墓王李去吳中風雅遠矣

北歸客至述懷

脫跡風塵少自寬對君杯酒話更闌去天尺五終非近行路尋常總是難
解佩尚餘孤劍在探囊不問一錢看泰階星斗時符合綵筆于今未易于

金陵七夕贈臯川司勳

片雨明河拭雙星閣道臨論歡天上別驚候旅中深夕吹催飛藿商聲動
早砧城南倦游客同折此時心

鬪鷄圖

英年曾入鬪鷄場金距狸膏事已荒惟有雄心志未得披圖猶自問低昂

中秋長干曲三首

內橋南走是長干十里平鋪白玉寒踏盡馬蹄塵不動半窗明月此中看
花燈百隊走兒童盡道仙娥降月中縱是霓裳看不見白毫光裏度香風

玉笙低引紫簫長不許商音斷客腸聽到月斜纔入破飛來七十二鸞鴛

錢處士穀

穀字叔寶少孤貧失學迨壯始知讀書家無典籍游文待詔門下日取架上書讀之以其餘功點染水墨得沈氏之法晚葺故廬讀書其中間有異書雖病必強起匍匐借觀手自抄寫幾于充棟窮日夜校勘至老不衰嘗纘績漢都文粹若干卷性頗勁直不能容人一介不苟燒香洗硯悠然自得商英中先民之風子允治字功甫貧而好學酷似其父年八十餘隆冬病寤時日鈔書薄暮不止功甫歿無子其遺書皆散去自是吳中文獻無可訪問允雖讀書種子絕矣功甫詩篇甚富應酬汜濫頗不欲傳子後余深知其意故不錄焉

題畫雜花

淡白輕黃各闢奇嫩紅殷紫總芳菲上林春色原無賴不斷生香惹客衣

陸處士治

治字叔平吳人少年爲俠游長而束修自好種菊支硎之傍自守泊如也工寫生得徐黃遺意山水喜做宋人而時出己意爲王元美臨王安道圖

四十幅奇峭削成與安道相上下又與元美游兩洞庭画洞庭十六景元美稱其上逼李郭馬夏而下勿論也晚年貧甚有貴官子因所知某以画請作數幅答之其人厚具幣以謝叔平曰吾爲所知非爲貪也立卻之叔平画請之而強必不可得不請之乃或可得年八十餘而卒詩亦有秀句可誦

仕女觀流水小景

銀塘秋水玉娟娟霜葉漂紅去渺然幾欲題詩寄遠海只應流水到君邊

倦綉

洞房深鎖碧窗紗玉樹階前護翠霞移得綉牀渾不倚金針愁刺並頭花

張左處過訪漫答

學稼甘吾老看花喜客留鶴鳴童錯應鶯語伎先謝山水將身隱圖書足臥游君家雙玉劍尚在匣中不

回了蘭

玉戟棱棱應節分枝枝柔玉紐香雲凝粧凝待三更月露染生綃六幅裙

張山人本

本字斯植吳之東洞庭山人王文恪以退傳家居從學古文嘗讀專福濟
觀賦九月梅花詩都元敬見而使人詞之斯植方正襟夜誦元敬就之晤
語賦詩贈之晚自號五湖漫士黃淳父張幼子共定其詩陸子傳為之傳
秋夜登閭門城樓

月白三吳晚風清八月秋芙蓉照江國蟋蟀上城樓海思飛雲亂鄉心落
葉愁忽聞黃鶴笛清夜重淹留

山齋秋夜

洞庭秋清夜何寂蓬影蕭蕭楓葉白雲滿几月在闕碧水浮堦花映門
袖中野泥空詩艸醉裏家山污酒痕半落空江誰吊古靈胥還有未招魂

顧隱士祖辰

祖辰字子武長洲人祖蘭弘治戊午鄉舉今樂安於潛二縣歸隱吳之臨
頓里有地數弓竹木翳然結隱二十餘年清風穆如也蘭子德育家貧好
學手錄幾數千卷子武襲祖父餘風老屋三間破榻竹几庭中古樹一株
雜花數本閒作小詩及画不以示人自娛而已臨頓為陸魯望故里其中
多名藍蕭寺風日晴美步屨過從倘徒好事者埽地折花以候其至至必

留連移日亦終不就人一飯也文閣學文起作吳中先賢小記特表子武謂可繼邢量杜瓊之後云

閒步

僻徑無車馬沿流看捕魚斷橋踈雨過古木春風餘片語款隣曲孤懷仍索居悠然真意在花竹傲甯虛

夜步

黃昏門未掩偃寒倚孤松正見水中月遙聞風外鍾村虛春寂寂烟遠樹重重只覺胸懷微吟送短筇

獨立

久病江湖老長依七尺筇年光變燕雀巖壑自雲松獨立深遐思微吟遲晚容隣翁隔春水貰酒漫相從

晚步

風疎門柳薄日落暝烟濃向樹鳥群亂隔溪山數重病閒吟短句衰怯倚枯筇更有幽深意寒流來暮鍾

雨過有懷山中素友

雨過一天碧風來滿
綠涼餘酣消枕簟長
病積年光靜愛蛛絲
巧閒多燕子忙有懷
賦招隱寄桂小山芳

雨後酌隣翁

江平新雨過林闌
晚山微采綠仍驅收
看雲方拚扉因知農
事暇遠貫村醪歸
秉燭招比隣相酌願
無違

客去夜坐

鳥齋門前樹嵐沉
水上山忽聞隣犬吠
知是漁舟還老病青
畦廢長貧白首閒
意中人去遠寂寞道
非閒

病中有懷周二韜叔

向夕閉窗坐檯
翠竹色多清虛
酬破研閒寂
沈痾山遠嵐將
暝春殘鶯懶
懶過長安有游
子何處醉顏酡

曉過題潤泉山房

翠微支遁隱新
構習清虛
施食來山鳥
翻經擊木魚
花傾知某夕
月上屬涼初肯
借一椽隙相
容半榻於

梁太學成魚

辰魚字伯龍崑山人以例貢爲太學生身長八尺有奇虬鬚虎顏好輕俠
善度曲嚀喉發響聲出金石崑有魏良輔者造曲律世所謂崑山腔者自
良輔始而伯龍獨得其傳者浣紗傳奇梨園子弟喜歌之儻蕩好游足跡
遍吳楚間欲北走邊塞南極滇雲盡覽天下名勝不果而卒同里王伯稠
贈詩云達人貴偷生焉顧一世譏伯龍慕伯典徇情良似痴彩毫吐艷曲
燁若春袍開斗酒清夜歌白頭擁吳姬家無儋石儲出多年少隨玄暉愛
推獎此道今所稀

屈原廟

寒雲捲映廟堂門旅客秋來薦水蘩山鬼暗吹青殿火靈兒喜舞白霓旌
龍興已逐峰頭夢魚腹空埋水底魂斑竹叢叢雜芳杜鷓鴣飛處欲黃昏
采石磯亭李太白

停橈磯下奠椒觴艸木猶聞翰墨香飛燕已辭青瑣闥長鯨自上白雲鄉
他年有夢游天姥此夕無魂到夜郎西望長安漫惆悵金鑲春殿久荒涼

純扇

朝來雨映蝶分百花房雨洗扇亦多情拂爾雙飛去

贈王卿

絳羅裙軟醉榴花，午夜高樓月倍嘉。曲罷暗香人不識，半槽餘燬在琵琶。

蘇惠

淚痕點滴錦花浮，幾載拋梭織未休。願得璇圖似夫壻，殘絲斷處認回頭。

陸文組

文組字子纂，姑蘇人。

子夜歌

染華作儂衾，持冰置儂枕。城烏夜夜啼，苦寒不成寢。

美人寄書

秋夢無憑客路遙，尺書封寄恨迢迢。吳綾不及桃花紙，顏色都從別後消。

朱太學承爵

承爵字子儂，江陰人。有存餘堂詩話，自署盤石山樵。

落花詩次文徵仲韻二首

雨雨風風太恁情，眼前紅白霎時盈。駭尋紫燕穿香戶，寂寞紅鶯哭錦城。
短夢一場春事散，好懷三月客愁輕。明朝急就東園醉，試取殘詩補得成。

少婦含情半自傷，有丹疑可駐春光。
樽前好事風前影，雨底殘脂淚底妝。
倩此落霞烘老圃，趁它飛絮繞橫塘。
珠簾錦瑟南朝怨，樂府誰翻字字香。

陳山人鳳

鳳字羽伯，無錫人。父周仕，河南參政。羽伯讀書習隱，嘗月夜挂琴松間，謂所馴山猿得詩，擁膝自吟，聲與猿嘯相應。性好結客，父黨王問以下無不造門。子以忠字貞甫，以鄉舉仕光州，字爲王承父。顧益卿之友，以豪俠聞。于時同時南都有陳少參鳳者，亦字羽伯，詩列于別卷。

花園子

當年內苑花如綺，萬樹紅雲日邊倚。
監使惟承巡幸歡，諫求那惜花園子。
別有朱門令尤急，綠衣怒叱青衣執。
春風慘慘白日寒，愁把花枝對花泣。
祇今聖主罷游畋，詔書屢却黃龍船。
歲時雖有上林役，種植還堪助衣食。
君不見玄明宮少陽院，秋雨霏霏秋艸遍。

勾曲道中早行

京國秋風急，驅車還曉行。
石林清露滴，野水白烟生。
逾坂遲童僕，問程傾弟兄。
丹霞開曙色，前館正鷄聲。

江上

長風吹古壘，落水下滄波。孤月動寒幌，暮烟生碧蘿。客懷期雁急，人語入村多。又宿秋江上，依然舊釣蓑。

雨中客至

新水柴門漲碧沙，孤村烟樹隱漁家。客來湖上偏逢雨，春到江南又見花。沽酒隔隣傳小艇，打魚深夜出枯槎。浮生莫遣浮名誤，醉裏還驚兩鬢華。

趙秀才綱

綱字希大，無錫人。幼聰穎，嗜酒能詩。二十九歲而亡。寄洛陽李秀才二十字，黃龜之見而歎曰：「入唐人詩中，未易辨也。」

寄洛陽李五秀才

未得吳公薦，空憐賈誼才。年年三月裏，相憶看花來。

西郊

山關啓翠微，霜鐘自晨夕。花裏一僧來，冷泠振金策。

徐定夫

定夫字士安，海鹽人。有留吟稿。

唐詞

禁門秋艸雨中生
睡醒芙蓉小帳清
幾日內庭宣與少
紫薇花底學吹笙

范片

言字孔嘉秀水人有菁陽集

渡排市

馬怯千邱雨帆開五兩風
江山瀝去住踪跡任西東
深樹哀猿裏孤城面
角中自深羈旅思寧為酒杯空

逆浪船

君不見李廣難封侯黃楊厄閏年
黃楊厄閏短復短白頭李廣徒稱賢
又不見章臺柳枝高拂鞦今日青青明日剪
淮陰金印大如斗身盡弓藏烹
烈狗槽烏高揚白馬馳中流
失瓠知不知前途利鈍吾何有
請君試酌松陵酒

謝賈實齋憲副

水邊躍春魚山晴照客居
菰蒲淮水際松檜漢年餘
酒熟雲安市田荒艸
下崇嬌兒勝筆研塗抹老夫書

湖上

誰開湖上閣，獨對晚來鷗。
鶯語排花出，湖聲帶雨分。
遙看旌旆散，閒與海鷗群。
自笑江干老，悠然臥白雲。

書信

寶曆逢搖錦帳垂，曉晴漸起闌花枝。
濃妝未必能承寵，何事幽禽喚画眉。

徐後

嘉靖中餘杭詩人作西湖聞笛詩一時傳之

西湖聞笛

月白霜寒客夢醒，笛聲迤出柳洲亭。
莫教吹過孤山去，風裏梅花不耐聽。

吳舉人世忠

世忠字元孝，歙人。嘉靖壬子鄉薦。王寅曰：元孝詩渾厚典實，彤彩不遺。若夏霖行不徒槁竒，意有所託，歌風臺亦灑然有生氣，不是金盤一擲人。一揮草散天邊月，又皆盛唐稀句也。

夏霖行

女媧之基波面懸，無人力補東南天。
雷公玉女不知天，已漏復鳴天鼓大。

笑於帝前江翻海倒地無軸六鰲飛上膊宵顛遂令萬姓赤子爲魚鱗三
山五岳俱迴旋郡國嗷嗷訴愁苦九龍九龍爾無侮吾欲誅九龍臨之充
我一杯脯大聲叫帝聞又恐悶者怒心知事不濟反鎖臥環堵卽今一月
仍滂沱太陰猶難畢之向畏人預愁耳生禾百草爛死詎足多豐年之望
已蹉跎霖乎霖乎奈爾何

歌風臺

君王畫游日壯士俱錦衣猶憐沛父老爭親漢旌旂湯沐開新邑風雲憎
舊威祇應千歲後魂繞故鄉飛

從軍行二首

呼白新誇好手身望塵星散漁陽亦知賭勝輕七尺不疑金盤一擲入
圍合孤城勢已危少年膽氣更輸誰一插並散天邊月知是漁陽豪俠兒

送方二敬之北游

新製貂裘稱體輕試裝寶劍已雄鳴黃河至後無舟渡獨跨驄踏冰上行

唐汝龍

汝龍字起潛歙人其窮居感懷詩云憶昔垂綰白玉堂先人退食教文章

孟守之學士之子也

賦得美人團扇草

結伴蕩春思啼鴉綠枝分行拾瑤丹列坐盛光儀作態抽並疾含嬌出
葉遲來中蕙一算花下獨揚眉

贈樊三

楊家長才法入神傳向關西爾獨真萬奈梨花飛月堂東吳敵手未逢人

孫良器

良器字貢甫休寧人王寅曰貢甫詩才清思暢早游吳興卽有名縉紳間
過姑蘇一首言簡意微亂離在目讀之不免悽然真盛唐流弊也

擬薄帷鑒明月

暈寫深閨影帷中悵獨眠隔簾鈞並曲入手鏡俱圓初疑含薄霧明似拂
輕烟離別經秋菽盈虧自歲年

過姑蘇有感

東吳城外盡烽烟百姓流移半在船爲問秋風昔來雁稻梁今有幾家田

范如珪

珪字文瑞休寧人

江上

江上西風雨復晴，蒹葭深處釣絲輕。何人隔岸吹長笛，楊柳秋江一夜生。

吳錦

錦字有中休寧人

贈查叟

曾逐鍾生侍武皇，鴟尾從獵長楊歸。來兩鬢紛如雪，曲曲新聲總斷腸。

鄭玄撫

玄撫字思祈號梧野歙人

湖上贈美人

琵琶新曲轉繁遲，停棹中流日暮時。細雨可憐紅袖濕，愁雲偏惹翠眉垂。

汪日夢

王寅曰人不貴名詩豈在富，若妖狐行野碓。風葉滿春白自越，常情寒壁

可寶也

秋閨

秋風望關寒征夫何日歸新涼拋絢扇
八
夢滅裙圍鴻雁西北來哀哀乞
寒衣裁縫宵獨坐紅燭對清輝

山行

澗道散寒流衝沙漫田畝妖狐行野碓風葉滿春白

詹斗文

斗文字玄象歛人王寅曰玄象奇才縱橫不暇程度苟有從入便見稱奇
若天上謠恨猶世間人道天上事然已氣離烟火思結雲霄誦之冷然不
覺高舉

天上謠

千尺仙臺水玉軒雲中鷄犬寂無喧桂花渾白如人世露濕霓裳冷不翻

寄張淑

豔舞嬌歌張淑家相思相隔海東涯齊王城下尋常見笑折楊枝雪白

邵山人正己

正己字格之休寧人以製墨名于世所謂邵青丘者也

銅雀臺

寂寂銅臺望飄飄總帳懸君王遺令日是妾隋陽年舞影傷羅綺歌聲咽
管絃西陵松栢冷日夕鎖寒烟

宮詞

月轉梧桐夜漸闌長門寂寞覺秋寒臨風欲奏相思曲抱得琵琶不忍彈

李山人敏

敏字功甫林寧人號浮丘山人與陳有守汪淮共撰新安詩集王仲房曰
功甫詩切事嚴偶五言律多有可誦若窗間樹鷄柵籬落晒牛衣宛然山
居之風前未道及

逆金景茂之鳳陽

驄馬紫絲韉征人向鳳陽天形入淮泗樹勢引濠梁古亳元湯業新豐本
漢鄉皇陵瞻王氣盤鬱一蒼蒼

題流口吳逸人山居

巖泉鳴翠微流口舊漁磯市遠修琴去雲深採藥歸窗扉樹鷄柵籬落晒
牛衣世事無心理長鏡老蕨薇

春曉

艸芻臨春浦蓬扉驚鷗鴉水明殘夜月雲傍隔溪花

陳山人有守

有守字達甫休寧人王仲房曰達甫弱冠從親宦長平一見常評事倫歸而詩名遂起寄墓令人詠者雖多多落凡品若西湖菴埋沒中土日銷沉五國杜鵑夢千城都護吟典實老蒼高出凡品

岳墓

過廟仍瞻墓寒林氣鬱森西湖菴埋沒中土日銷沉五國杜鵑夢千城都護吟未須追古憤延佇重傷心

秋日過大雲寺

出郭躡雲岑祇園淡午陰林疏風禁下壇窈雨花深石室僧初定金堂梵欲沉寥寥方外趣殊了去來心

汪太學淮

淮字禹又休寧人本富家以諸生入貲爲國子生好稱詩家遂中祀其論詩苦愛仲長統乘雲無轡騁風無足之語以爲詩家風軌殆非俗流也

紫駱馬四解

誰家白面郎跨下紫騮馬
蹀躞踏落花驕嘶綠楊下
黃金絡馬首白玉作馬鞭
盤旋不肯去墻外看鞦韆
繡幃空中起湘裙風外飛
倒垂倭墮髻妬殺路傍兒
爲問馬上郎墻高復幾許
海青不上天那得天鵝去